

## ASO LUA, 30 IUNI 2015

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono. Ia ou te manatu ua pei o se teufugalaau ua i luga o le laoi a le tatou Palemene i lenei aso, ua manogi sasala, ua puaina i vao ae liaina i ala le manogi ma le matagofie o lenei aso. Ua tatou fesilafai ai i le taeao manuia ma le taeao ula i le alafai mai i le soifua lelei ma le manuia o le tatou Palemene. Ou te talitonu e tu manu ae le tu logologo i le vaai atu foi i tulaga o lenei aso ma le alafai mai o le tatou Palemene i lenei aso ma foliga vaaia o le alofa ma le agalelei o le Atua ua taitai ai le soifua manuia o le tatou Palemene i lenei aso aua le tuupoina o le tatou galuega. Ou te faafeiloai atu i le tulaga aloaia i le paia ma le mamalu maua o le tatou Palemene i ona tulaga faalupe, faamalo atu le soifua manuia, faamalo le soifua maua i lau Afioga i le Palemia ma le mamalu maua o le tatou Kapeneta, aemaise foi o le Taitai o le Itu Agai ma le Sui Taitai aemaise o le paia maua o le tatou Palemene i ona tulaga faalupelupe. Malo le soifua manuia, malo le soifua maua i lenei taeao fou. Faafetai i le Atua ua toe aofaga potopoto ona o le faaauauina o le tatou galuega. I le aso ananafi ma le po anapo, na tau ai lau o le faamoemoe aua le pasiaina o le Tala o le Tupe, ua uma foi ona tatou patipatia lea tulaga aloaia ma le tulaga taualoa, ua iu ai se tasi o galuega tele sa tatou feagai ai.

O lenei taeao, e le na ma le laina le talosaga vaivai a le Fofoga Fetalai sa tuuina atu ona e le mama i le Maota lenei e pei lava o upu tautino o le Maota lenei e atoa i ai le atunuu, o le paia i Aiga, aemaise o Faleupolu e fia o Samoa, o outou lava o tootoouli na fai'a mai le fuifui, sama se mago fili se agavaa i le filifiliga a Samoa, o le Fono sili lenei a le atunuu. O le aso o le a tatou faatasi ai ma alo ma tama fanau a le tatou atunuu le Manu Samoa, se i ave se faamanuia ma se tuualalo aemaise le feagai ai i le faagatama faava o Malo e pei ona lauiliuina nei e le tatou Malo ma le tapenaga a le tatou atunuu, e fai ai le tatou Palemene ma lenei aso i lo outou paia ma lo outou mamalu e fai ai tatou ma sui e fai so tatou sao ia manuvao e ave se tatou faamanuiaga ma se tatou tuualalo.

E molimau i lenei taeao i le agaga faafetai ua lau i ula ae pou i toa le fale nai Amoa ua lanumoana ma le tatou Maota. O le lanu lena o le loloto o le moana sausu e feoai ai iasa, o le lanu foi o fetu o le lagi o lo o i ai le feagaiga a le Atua, le valoaga na ia fausia le lagi ma le lalolagi i lona malosi, ae faatini mea uma i le Palealii o Ana galuega, o a outou Afioga i lenei taeao.

Ona manatu lea, ua atoatagi, o se lava e le o lanumoana, o lo o i ai le taimi e te afio ai e sui mai lou laei, ioe. O se e le usitai i le Fofoga Fetalai, ou te le fai atu i mala e agai mai, a o lena e i ina le tofa ma le faautautaga e atagia ai le loto ma le fatu o le tagata e loto Samoa, ae atagia ai o tatou o le atunuu o lo o

i ai le tofa ma le faapelepeleina o measina a le atunuu. O faiva e tapuaia o faiva na e manuia. O se taimi auliuli ona taunuu mai lea ma faailoa atu, ona faapena lea ona faagasolo tulaga o lenei aso.

**TULAFONO TAU FAAOFI O LE OFISA AUTU O MATAUPU  
FAALETULAFONO MO TAGATA LAUTELE 2015 – faitauga faatolu**

**FOFOGA FETALAI:** Tulai mai lau Afioga i le Palemia ona o lo o toesea le Afioga i le Minisita mo Faamasinoga ma Pulega tau Faamasinoga.

**Susuga Hon TUILAEPA FATIALOFA AUELUA LUPESOLIAI  
AIONO NEIOTI SAILELE MALIELEGAOI (Palemia):** Lau Afioga i le Fofoga Fetalai, i le toesea ai o le Afioga i le Minisita, o lea ou te faatu ai le lafo, *Ina ia faitauina nei le Tulafono Tau Faaofi o le Ofisa Autu o Mataupu Faaletulafono mo Tagata Lautele 2015 i lona faitauga faatolu.*

*Faaluaina e le Sui Palemia, Minisita mo Tupe Maua, Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O LE FONOA A LE AU TUSITALA MA LE  
AU FAASALALAU 2015 – faitauga faatolu**

**Susuga Hon TUILAEPA FATIALOFA AUELUA LUPESOLIAI  
AIONO NEIOTI SAILELE MALIELEGAOI:** Lau Afioga i le Fofoga Fetalai out e faatu le lafo, *Ina ia faitauina nei le Tulafono Tau Faaofi o le Fono a le Au Tusitala ma le Au Faasalalau 2015 i lona faitauga faatolu.*

*Faaluaina e le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O FEAGAIGA I SINEVA 2015  
– faitauga faatolu**

**Susuga Hon TUILAEPA FATIALOFA AUELUA LUPESOLIAI  
AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Feagaiga i Sineva 2015 i lona faitauga faatolu.*

*Faaluaina e le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga ma faapea ona pasia le Fono Aoao Faitulafono.*

## **TULAFONO TAU FAAOFI O LE OFISA E FAAFOEINA MOLIAGA TAU SOLITULAFONO 2015 – faitauga faalua**

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o le Ofisa e Faafoeina Moliaga Tau Solitulafono 2015 i lona faitauga faaloua ma ou te fia tautala faamalamalama i ai.*

*Faaluaina le Sui Palemia, Minisita mo Fesootaiga ma Faamatalaga Tekonolosi.*

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o le Tulafono Tau Faaofi lenei e o faatasi ma le Tulafono o le Teuiteuga o le Faavae lea sa tatou pasia i le po anapo. O le Tulafono Tau Faaofi lava ia, o le fatuina o le Ofisa fou e nafa ma moliaga, ua aveese mai totonu mai le tatou Ofisa o le Loia sili. Ma o le agaga tonu lava o le Tulafono Tau Faaofi lenei, e mulimulitai mai le upu foi lele, ina ia tatou taasisia le amiotonu ma ia atagia foi i a tatou faaiuga ma gaoioiga e fai le amiotonu. O lona uiga ia tatou faia gaoioiga e atagia ai le amiotonu o faaiuga. O lea la mai le tausaga na tutoatasi ai tatou, o le Ofisa lava e faatinoa moliaga i lalo o le Faavae, o le Loia Sili. A tulai mai la mataupu foi lea e ono atagia ai le felautoai, ona o le Loia Sili lava ia e tu mo le Malo. Afai la e atagia ai ni faaiuga e masalomia ai le Loia Sili, o i tonu lava e mafua ai. O le agaga tonu la o le Tulafono Tau Faaofi, ia aveese moliaga nei mai le Loia sili ae faatu se Ofisa faapitoa e nafa ma tulaga ia. Aua po o le a lava le iuga e sau pe amiotonu, ae ono fesiligia lava ma masalomia, ai ua oo i ai le malosi o le Malo e ono masalomia ai faaiuga e fai.

Lau Afioga i le Fofoga Fetalai, o le auau atoa lava lena o le Tulafono Tau Faaofi lenei, ma e ina ia mafai ona faatuina le itutino lenei o le Malo, e tatau foi ona teuteuina le Faavae ina ia mafai ai ona faataga le Ofisa lenei i lalo o le Faavae, ona o le Loia sili o lo o nafa ma mea ia. O le ala foi lena e le mafai ai ona alofia teuteuga o le Faavae, o lea ua maea ona tatou tagofia i le po anapo, a o lea faatoa tatou agai i le Tulafono Tau Faaofi o le faatinoga o le Ofisa ua mafua ai ona teuteu le Faavae.

**FOFOGA FETALAI:** Malo faafetai i le saunoaga a le Afioga i le Palemia. Ia, e manatu foi o lo o faafofoga ma le manino le tatou Maota. Ua avanoa tatou felafolafoaiga, tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai mo le avanoa i lenei taeao, e faatalofa foi i le paia o le Maota o Samoa aemaise o le faafofogaaga a le atunuu. E le toe tele se manatu i le Tulafono Tau faaofi pei ona faamalamalamaina e le Afioga i le Palemia. A o nai vaega ia, muamua, pei a ou toe tomanatu i ai, po o le faiga lea sa faatino ai le aveeseina mai o le

Law Commission, lea sa galulue faatasi i nisi o tulaga ma le ofisa o le Loia Sili i le amataga. Se i maoti lelei ma mautu ona tuu maoti ese loa lea. E pei o le faiga lea o le a fai ai? O le uiga o lau faamatalaga, o le tuufatasia pea lea o vaega o galuega, o accounts ma administration work i le amataga. Aua o lea ou te vaavaai atu i le Tulafono, ua tuuina atoa atu lava ma le malosiaga i lalo o le Faatonu. E le gata i le Tulafono, e filifili ai lava e ia lana ia aufaigaluega i tulaga uma. O se tasi lea o vaega, manatua foi o mea fou, e tele foi lea tulaga. Aua o mea ia sa faatino i lalo o nisi o Matagaluega a le Malo. A o lea la ua i ai le malosiaga i lalo o le Matagaluega lea. O se mea lelei tele. Ae po o i ai la le capacity po o i ai le malamalamaaga atoa i le faatinoina o ia tiute. Aua o le Matagaluega atoa lea e tau fofou. Afai la o le faiga lea e fai ai e pei ona sa faatino mai ai le tuueseina atu o le Matagaluega o le Toefuataiga o le Tulafono, le Law Commission, o se faiga lelei tele lea faiga.

O le isi vaega lau Afioga, o Tulafono lea ua aumai nei, na ona ou fia fesili lava, i le taimi foi lea e aveeseina ai pe faamaloloina ai Pule Sili, nisi o Tulafono ma tulaga faapena? E i ai lava le Tribunal lea e faatuina e iloiloa mataupu faapenei. Sa ou faapea o lea ua i ai le Tribunal lea sa tatou pasia i le isi taimi. Pe e le mafai ona faaauau ina ia tasi se Tribunal e vaaia tulaga e pei ona ave i ai mataupu faapenei e vaai mo le agai i luma. Aua o lea ua tatou vaavaai nei i ai, o lea e i ai foi ia.....o lo o aliai mai pea nei mea i Faaululuga o Matagaluega. Ua tataua la ona i ai pea se Tribunal faapitoa i tulaga faapea ma le umiua ona faatali ma tatou taumatemate po o le a tonu le tulaga o i ai. E pei ona pau lea o nai vaega lau Afioga, e toe matimati ai le tatou Tulafono ua tulai mai. Faafetai.

**FOFOGA FETALAI:** Malo saunoa. Tulai mai le sui usufono mo Falelatai ma Samatau.

**Afioga TAEFU LEMI (Falelatai ma Samatau):** E momoli atu le faafetai i lau Afioga i le Fofoga Fetalai. E muamua ona fia faamauina foi le faafetai e tusa ai o lenei taeao fou. Aemaise o le faatofalaiga a lau Afioga i le Fofoga Fetalai, ina ia tatou laei mai i le laei e faafeiloai ai le tatou au. E iloa-gofie lava i latou o lo o lagolago e manao ia manuia le faamoemoe o le au, ae iloagofie foi i latou o lo o tapatautali i le faamoemoe o le au. O le lanumoana ma le lanuuliuli lea o le a taaalo. A o lea e taaalo mai Aferika ma isi atunuu i i le taaloga lea. Ae momoli lau faafetai i lau Afioga e tusa ai o le faataua lea.

Lau Afioga i le Fofoga Fetalai, e tele lava Matagaluega e tau faavae mai ae latou talanoaina seleni e ono faamaumau ai. Aua e i ai le Ofisa Sili e i ai le Pulega, e tele auaunaga lautele e faavae ai. I lau matau, e lua lava ni ofisa ua ou fiafia lava ua faatu i lou taimi i le Palemene. O le Matagaluega mo Faalapotopotoga a le Malo, Public Enterprises, ma le Matagaluega la lea. O se faiga lelei ma o le Matagaluega ua faavaeina i se agaga lelei, ina ia uunaia ai lea foi vaega o le auaunaga, sa gafa ma le Ofisa o le Loia sili ma latou. Ae ua ou manatu ua oo foi i le taimi ua tataua ai ona tumavaevae vaega ia ma ave i ai le tatou faataua. Aemaise lava ina ia i ai le malosiaga tutoatasi e tuu atu i ai i lea vaega e faafoe ai lea auaunaga taua mo le tatou Malo. E pei o le agaga faafetai lea ma le manatu ua faaleo i lenei taeao ona ua lua i i Matagaluega ua ou fiafia ua faavaeina. Manuia le Fonotaga.

**Tofa LEVAOPOLO TALATONU (Gagaemauga Nu.2):** Lau Afioga i le Fofoga Fetalai...

**FOFOGA FETALAI:** Tulai mai le sui usufono mo Gagaemauga Nu 2.

**Tofa LEVAOPOLO TALATONU:** Faafetai mo le avanoa. Ua tele foi se vaega o se vaivaiga o lenei itumalo na tuuina atu anapo i le suiga o le tatou faavae. E pau lava lea o si vaega laitiiti lea na o se fautuaga. Pe e le mafai loa ona faamaoti loa ia tulaga tofi ia o le Loia Faufautua Sili a le Malo, leaga e pei o lea lava e tau o le Afioga i le Loia Sili. A o le loia lea... po o se loia sili e mataituina soligatulafono, toetiiti lava manaia le tau faasamoa. E pau na o se vaega. A o le mea lea na saunoa i ai le sui usufono lea faatoa mavae atu. O au tonu lava lea e faatusa mai i ai. Masalo e le o silafia lelei e le sui usufono lea le tulaga o le lē faia o sou ofu lanumoana. Ae ua vaai mai i lou pelaue lanumeamata o Ausetalia, o Niu Sila le All Blacks lea o Egelani le paepae. E avea ai lau lagolago i fanau uma lava, alo ma fanau o lo o taaalo ma aumai i i, o lea e omai e lagolago ma fai le tatou au. O le mea muamua lena.

O le mea lona lua, ua ou le faia se ofu ae se i... ou te le o talanoa i le jersey. O au o lea e i lalo lou short paepae ae short uliuli lou toalua la e i Niu Sila. O lau lena sikaili. Ae tailo la i le Taitai o le Itu Agai e leai ni ona ofu Manu Samoa o aumaia.

**FOFOGA FETALAI:** Masalo e le... O le a avatu pea le avanoa muamua i le tulai mai o le Taitai o le Itu Agai.

**Afioga Hon PALUSALUE FAAPO II (Taitai o le Itu Agai):** Lau Afioga i le Fofoga Fetalai. Faafetai i le Atua ua tatou aulia mai lenei taeao fou e tusa ai ma le tatou Fonotaga. O lea ua maea ona e faafoi le viiga i le Atua, e tusa ai ma Lana pule faasoifua. E pau lava le mea ua ou tulai atu ai lau Afioga, o se taimi ou oo i le Tulafono. A o lea ou te faatali i le taimi e faataunuu ai lau faatonuga. O le toe o i le fale o e o lo o ofu mai ofu uli. E le taua le ofu la e i totonu a o fafo, ioe o le Palemia, o le Sui Palemia, o Minisita ia e ofu uli uma mai, o lona uiga o la e tapuai i le All Blacks. Ou te faafetai o na e te lagolago le au...

**FOFOGA FETALAI:** Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai):** O le mea lea lau Afioga e tulai ai ni pefea i totonu o le Maota ona o upu lafo. Aua e mau lava e faalele mau e matau. Ae a silasila lelei i ana...e sao ai lava le saunoaga masani a le Palemia lea e fai soo i Afioga a lo tatou Alii. "E fai mata ae le vaai". O le ofu lea o le royal blue e faapena laei ia e laei ai le Palemia ma le Sui Palemia. O le royal blue, e te le malamalama i le distinguish o upu na, navy blue royal blue ma le blue. Ua e tagai la i ai. A o oe, e matua stand out lava le green, o lona uiga e te amio faa-Aferika. Ma le faaaloalo lau Afioga.

**FOFOGA FETALAI:** E manatu o le a le faafefinauaina... ae tulai maia lau Afioga.

**Afioga Hon PALUSALUE FAAPO II:** E taua le loto. Ia lanu blue lou loto. Ae pau lava le mea o le mea la e i totonu o lou loto la e sau i fafo, ona ofu uli ai lea. A o le mea taua ia manuia le faiva o alo ma fanau. O le Tulafono, faafetai lava, faatoa ou faafetai lava lea i se Tulafono. Ua tau ane le mafaufau o le Malo, i le mea na nanau atu ai lenei itu. O fautuaga lelei ia. O lea la ua faatino i le Tulafono lea. Aua foi sa tele lava a tatou finauga ma upu na felafoai. Ae tasi lava le fofo, o lea sa taumafai atu ai le itu lenei. O le faatino o le itutino lea. O le itutino lea e silasila totoa ia avea ma ana matafaioi. O le mea la lea ou te faafetai atu ai i le Palemia, ona ua tefa le tauala i lau Afioga ma le Malo e faatu se ofisa lea e pei ona matou fautua atu ai.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai...

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** O le faila lea e mafafia, o lauga uma lava a le Taitai o le Itu Agai lea e i totonu i i. E leai lava ma se mea o taua ai sa e lauga i ia mea po o se isi lava o le tou vaega. O lea ou te nofonono ma le faila o a outou lauga uma. E fai lava ma ou tilotilo i ai. O le mea lea ou te fiafia ai ia te oe, o le fai atu lava o lea mea lelei, “faafetai ua outou faia le mea na matou fai atu ai.” O le ala la lenei o lea ou te tulai atu ai, sei fai ma tau faasao mea ia. Ou te ofo i lou pepelo le emoemo.

**Afioga Hon PALUSALUE FAAPO II:** Lau Afioga e leai lava se isi tala pepelo e pei o le Palemia. A o lau fesili lau Afioga, talofa i le tatou faavae, o le faavae na fausia e o tatou tuua, o taitai ua fai i lagi le folauga. Ua matua tele Teuteuga. O lea e musumusu mai...ua masofa le faavae. E le mafai ona faatu lava o le Tulafono e aunoa ma le agai i le faavae? O le mea lenei o lea ou te tulai atu ai.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** O le mea e fia faasao.

**FOFOGA FETALAI:** Malie lava le Taitai o le Itu Agai.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Sa ou taua anapo. E faalua ona ou taua anapo, faatasi ona ou toe taua i le taeao nei. E pau lava le moliaga, na o le Loia Sili lea la ua vavae ese, e le mafai la ona e faia le mea lenei, seiloga e Teuteu le Faavae. O le mea lea ua ou maitauina, ua e matua lagolagoina lava le Tulafono. Ae e te musu e teuteu le Faavae e mafai ai ona fai le mea lea. E manatua foi nisi o Afioga a le Atua, “ o le tagata na te iloa le mea e tatau ona fai ae le faia, o le agasala”. O le Faavae na faataoto mai i le 1962, o lenei e i ai i totonu o le Faavae, ia le faatagaga e silasila i ai augatupulaga amuli. O le mea e le talafeagai ma le taimi, ia sui, teuteu. E leai lava se Faavae o se Malo o tulai mai i le lalolagi lenei o tumau. E suisui ona o le taimi. E i ai foi upu na e masani ona aumai i totonu o le Tusi Paia i Malo tetele ia o Metai ma Peresia. O Metai ma Peresia,

e faataoto loa le Tulafono, e sa ona toe sui e se isi. O le ala lena e i ai le upu “E le o ni Tulafono a Peresia ma Metai e tumau e faavavau e le sua. O fea la o i ai Peresia ma Metai? Ua leai, ua leai ni Malo. E le mafai ona tu se Malo i ni Tulafono ua le o toe talafeagai ma le taimi.

Lau Afioga i le Fofoga Fetalai, o le mea e pito sili ona matautia. O lou ioe i le Tulafono lea ua faataatia atu ae e te musu e sui le Faavae, e mafai ai ona sao le Tulafono lea. E pei foi ona e lagolagoina Tulafono, o le faataotoina o tuaoi o Nofoa ia e lua tu taulaga, ae e tetee i le Faavae e mafai ai ona tulai mai ni Nofoa tu taulaga. E te agai lava i le amataga o mea uma. A matala le amataga ua faigofie foi ona fai Teuteuga ia, lea na amata ai lau lauga.

**Afioga Hon PALUSALUE FAAPO II:** Lau Afioga i le Fofoga Fetalai.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, ua toso lava le laau felefele. O lea ua lavea fua le Nofoa tu taulaga, lea faapea sa ou tetee i ai. E leai. A tetee o lea na ou palota e lagolago i ai. Ae ui i lea...

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, e faalagolago nofoa tu taulaga i le Tulafono o Faiga Palota. Ae manatua foi, o le Tulafono faavae o le Tulafono pito maua o Tulafono uma. O le a la le uiga o ia mea? E tetee le fatu e mafua ai ona mafai ona fai mea ia.

Lau Afioga i le Fofoga Fetalai, e faapena foi la ma i, le mea lea tatou te talanoa ai. E leai se Faavae o se Malo o le lalolagi lena e tumau pea. E oo lava ia Amerika, masalo ua oo nei i le 500 Teuteuga o le Faavae.

Lau Afioga i le Fofoga Fetalai, o le sao lena o mea o Faavae. E leai lava se Faavae e tumau pea. E i ai vaega o le Faavae e tataua ona faaauau. E i ai foi vaega o le Faavae e tataua ona teuteu.

**FOFOGA FETALAI:** Tulai mai le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, na pau lau tala, teuteu le Faavae e aveese ai tiute ia sa fai e le Loia Sili, lea e ala ai ona ou faafesili atu, pe le ua lava la le Tulafono e faatu ai, ae ou te le tetee la i le aveeseina o tofi nei mai o i i ae afai e leai, e pule lava oe.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, e le mafai ona faia se mea faapena, e tataua ona teuteu le Faavae.

**FOFOGA FETALAI:** Malo. Se i tuu atu le avanoa i le fesoasoani mai a le Sui Palemia.

**Tofa Hon Fonotae Nuafesili Pierre Laufofo (Sui Palemia):** Lau Afioga i le Fofoga Fetalai, ou te fia fesoasoani atu e tusa ai ma le mataupu pei ona saunoa i ai le Afioga i le Palemia, o le Tulafono Tau Faaofi lea, e tataua ona aveese mai tiute. O le tiute lea ua faamatuu i le Director of Prosecution, e le mafai ona faaauau ona tauave e le Attorney General, e tataua ona faamatuu ese

mai le Attorney General ave i le Ofisa lea. E le mafai ona fai e le Director of Prosecution galuega ia ae toe fai foi e le Attorney General i le taimi lava e tasi.

O le mafuaaga lena e ala ai ona teuteu le Faavae, e faasee mai tiute ia o lo o tauave e le Loia Sili i le taimi lenei, faasee i le Ofisa fou lea, ona manino ai lea ma maioioi functions a Ofisa e lua.

**Afioga Hon PALUSALUE FAAPO II:** Lau Afioga i le Fofoga Fetalai, o le mea lea e leaga ai le moe moe tu ae faasese. O le mea tonu lava lena o lea ou te fai atu ai e aveese, ae pe le mafai la ona faatu aveese tiute mai le Loia Sili e teuteu ai le Faavae, e le mafai ona.....ae le mafai la ona faatagaina e aunoa ma le teuteuina o le Faavae.

**Tofa Hon Fonotoe Nuafesili Pierre Laufo:** O le tofiga lea o le Loia Sili e i lalo o le Faavae. E le mafai la ona faapea e le teuteuina le Faavae, e teuteu le Faavae e aveese mai tiute ia e ave i le Ofisa fou lea. O le mafuaaga lena e ala ai ona teuteu le Faavae.

**Afioga Hon PALUSALUE FAAPO II:** Lau Afioga, o lena e fai mea i ou taliga e te le o lagona mai le mea lea ou te fai atu ai. O le mea tonu lava lena o lea ou te fai atu ai, na o le teuteu lava o le Faavae e aveese ai tofiga o le Loia Sili ae le mafai ona faatu leaga o le Tulafono le mea lea e aunoa ma le teuteuina o le Faavae. O le mea tonu lena o lea ou te fai atu ai, ae a leai, e fai lava lo outou finagalo.

**FOFOGA FETALAI:** Ou te manatu ua manino le taumafai mai a lau Afioga i le Taitai o le Itu Agai. O le manumanuga i lou finagalo ia aua ne i suia soo le Faavae, o lea ou te maua. Ae a faafofoga oe i le taumafai mai o le tali a le Malo, e le mafai ona faatinoina tatou suiga fou nei pe a tatou le agai i le Faavae. Ona faapea lea, taoto ai lea i i, o lea foi ua e saunoa i le faaaliga manino, o le a pule le Malo i le mea e talafeagai, o le tali lena. Ae taua lo outou finagalo ma la outou faamanatu.

Tulai mai se tasi o sui usufono mo Vaimauga Sisifo, Tofa Lefau Harry Schuster.

**Tofa LEFAU HARRY SCHUSTER (Vaimauga Sisifo):** E muamua lava ona momoli atu lau faafetai i lau Afioga i le Palemia ma le Ofisa o le Loia Sili mo lenei suiga taua. E faapito lau faafetai i le Susuga i le Loia Sili, a faatusa e matou o loia le malosiaga lea e i le Loia Sili i le taimi lenei, o le matua matautia le tele o le malosiaga lea e i ai. Ma tatou te iloa i le taimi lenei e leai se Faalapotopotoga e manao e faamatuu atu se malosiaga ae faafetai i le Afioga i le Loia Sili mo le fautuaga e faamatuu atu le malosiaga lea e ia Ia i se isi Matagaluega. E sao le saunoaga a le Afioga i le Palemia i le masalomia lea i le Tulafono, o le i ai o le malosiaga e faatino ai moliaga i le Loia Sili, a o le Loia Sili foi o le loia lea e faapitoa mo le fautuaina le Malo. O se faataitaiga faigofie o le faiaina mai le faamasinoga o se solitulafono o le ita o le loia lea e faiaina i le lelei foi o le loia lea na tetee, ae sau fai i i, sui le Tulafono leaga o lea ua tatou...

E moni ai saunoaga a Afioga i le Palemia, ua talafeagai le aveese o le tulaga lea o le faatinoina o solitulafono mai le Ofisa o le Loia Sili. Ou te maitaulia



mai aso la, o le mea lea o le faiga o moliaga ma le faiga o prosecution i le faamasinoga, o faamasinoga uma lava, faamasinoga faaitumalo ma le faamasinoga maualuga, ai o le taimi na faavae mai ai Samoa o ou laitiiti na laitiiti foi solitulafono, sa fai uma lava e leoleo.

O lea e molimau le Afioga i se tasi o sui usufono mo Falealili, Tofa Tusa Misi Tupuola, sa fai uma lava e leoleo moliaga ma faatino le prosecution faatoa faatino nei lava e le Ofisa o le Loia sili tiute ia i se vaitaimi o le 1970 ina ua iu mai tatou Loia ia sa aoga i fafo e i ai Tuiloma Neurons Slade, o Aeau Semi Epati, o le Afioga ia Patu lea e Faamasino Sili nei, a o aso la, o leoleo lava sa faia prosecution. Ma o se tulaga lelei lea. I faamaumauga i soligatulafono ma feeseeseaiga i tulafono lautele, i le taimi lenei i le faamasinoga maualuga ua ova atu i le 2,500 faamasinoga e faaulu i le tausaga. O faamasinoga faaitumalo e ova atu i le 5,000 faamasinoga i le tausaga. O le faamasinoga fesoasoani e aupito i ai, e ova atu i le 3,000 faamasinoga i le tausaga.

E 75% o mataupu nei o soligatulafono. Ma ole 25% o feeseeseaiga faalauaitele i Tulafono. Ma ua alagata ai i le tulaga lea faapitoa lava le avatuina o le faamalosi o tulafono i soligatulafono i le vaega lea o le aveese mai le Ofisa o le Loia Sili. E le gata ina talafeagai o le a atagia o la e fai le mea moni, ae e taua le Loia Sili lava ia, e faamalosi lo latou malamalama i le fautuaina o le Malo, ma e faapitoa foi lo latou lava malamalama... Ua tatou maitauina nei i le 30 tausaga lea ua tea atu, i le tele o le mau feagaiga ma tulafono e afua mai Malo Afaatasi, e faaopoopo foi la i feagaiga ma isi Malo ma isi Faalapotopotoga. Ua manaomia le faapitoa o le malamalamaaga o le Ofisa o le Loia sili e alu agai tulaga ia, na i lo le alu o le malosi i le isi 70% lea na o le pau le mea lea e i ai o le sue pe alu i Tafaigata lena tagata pe leai. Ae a le aoga le malosi, ia alu lava i tulaga ia o le vaavaai o tulafono nei i feagaiga ma Malo afaatasi, aua o le tulaga lea o le a fesoasoani i le atiaeina o le tatou atunuu. E laitiiti Samoa, ae sao ai le tala foi lea, a tago Amerika i le tala Amerika, e manaomia le alualu i luma i le lumanai, e tele le malamala o tatou loia ia e i le Ofisa o le Loia Sili i mea tau trade, latou te iloa vaega uma lava e mafai ona ofi atu ai oloa gaosia i totonu o Samoa i isi atunuu ia i fafo. E fai o le fai mai e tatala le trade, ae i ai foi tulafono a isi atunuu e taumafai lava foi e taofiofi. A le tatala la ma malosi le fautua a loia i le Ofisa o le Loia Sili ma faateleina lo latou malamalama, tatou te fiu lava e toto faatoaga, ae le mafai ona alu i maketi ia i fafo.

O se manatu vaivai lea lau Afioga i le Fofoga Fetalai. Faafetai mo le avanoa.

**FOFOGA FETALAI:** Malo faafetai. Ia, tulai mai le sui usufono mo Aana Alofi Nu.3.

**Afioga TOELESULUSULU CEDRIC POSE SALESA SCHUSTER (Aana Alofi Nu.3):** Faafetai lau Afioga i le Fofoga Fetalai mo le avanoa. E faaopopoina foi le agaga faafetai o lenei sui usufono i le Afioga i le Palemia aemaise o le Ofisa o le Loia Sili i le Tulafono ua faataatia. E lagolagoina foi le vaega o lenei Tulafono Tau Faaofi. Na pau lava o lea lau Afioga o le tuualalo i le Komiti o le a faapea ona toe iloiloina le Tulafono Tau Faaofi. Muamua, e o faatasi ma le Teuteuga o le tatou Faavae. E maitauina o le a sau ai le tagata e mafai ona appoint e fai ma Pule Sili o le Ofisa lelei, e ao ona o se tagata e mafai ona avea ma faamasino i le Supreme Court, atonu e mafai

ona fesoasoani mai ai e o lo o tapenaina. E pei lava i lou tau iloa na o faamasino o le Distric Court e mafai ma tagata foi nei e aofia ai le Attorney General, po o ai uma ituaiga tagata e ofi i totonu o lea vaega e tau o le Supreme Court Judge.

Lona lua lau Afioga, o le toe silasila foi lea ia taumafai ona i ai se time limit pei ona faaalua foi e nisi o sui usufono. Ma le lona tolu lau Afioga i le Fofoga Fetalai, o le vaega lea e ao ona ioeina pea le vaega lea o le ioeina e le Minisita e responsible i lenei Faalapotopotoga po o lenei foi vaega o le a faatuina, ona e tataua ona sau i totonu, a le o le Palemia po o se Minisita e appoint e le Palemia. Faafetai lau Afioga i le Fofoga Fetalai.

**FOFOGA FETALAI:** Malo faafetai. Tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, masalo na o le pau lava lena o nai mea laiti ia sa laga e moomia ai se tali atu. O le vaega lea sa laga i le capacity, ona o se itutino e fou. O mea faapea, e faamoemoe lava i e o le a tofia e le management, le Pule Faatonu ma e uma i le Pulega. Afai lava i le tulaga masani ona tofia atu i latou o lauia o le Pulega, e leai lava se mea e popole ai fua i le capacity. A e afai foi e tofi atu i ai tagata e le o lava le..... e le i leva ona i ai i tulaga faapenei, e amatamata laiti lava mea, ma faapena ona faapoopoina ai pea le capacity.

Ia o le tulaga lena o le capacity. A o le vaega lea sa laga i le itu lea i le tribunal, o le tribunal lea e avatu i le Tulafono Tau Faaofi, o le Komiti foi lea e nafa ma tofogi, le faatulagaga o tofogi uma lava o le afaigaluega. Manatua foi le tribunal lena i le Tulafono na aumai lea ou te tau tomanatu o le 2001, na faatuina ai le tribunal lea, o se Komiti faigaluega, o le latou lava galuega o le vaai totoa i le vasaga o tofogi a le afaigaluega uma lava a le Malo. O le uiga o lea mea, e aofia uma ai lava vaega eseese. O tua atu, sa ese lava le Public Service Commission latou te faatulagaina tofogi o le afaigaluega a le Malo, e le aofia ai le Palemene, e le aofia ai leoleo, e le aofia ai foi le legislative, e le aofia ai foi le judiciary.

A o le agaga lena o le Malo i lena taimi, e le tataua ona toe tuuese faapea ,e tataua lava ona tasi le body latou te oversee ina le faatulagaga o tofogi, e fai lava sina tele o le eseese o le va, aemaise le Palemene. Masalo o le Palemene o le itutino lea sa aupito sili lava ona maualalo le tofogi. Ona o aga foi a Itu Agai i lena taimi. A faatu mai e le Malo le siitaga ae tutulai mai le Itu Agai ma fai mai, “Talofa i le atunuu!” O le mea la lena na mumusu ai loa le Malo e fai ni siitaga, ona alu ai lava lea i luga o isi itutino, ae alu lava faapenei i lalo le Palemene.

O le mafuaga la lena na manatu ai e le fetau i se itutino o le Malo ona i luga le isi ae i lalo le isi, e tataua lava ona o faatasi, ona taofia ai lea ma le mea lea o le tuua e le afaigaluega o le isi itutino ae laga i le isi itutino ona o le eseese o tofogi. O lea la e taumafai lava le Malo e faalagatasia ai le mea lea o le feoai o tagata ona o tupe. O le tribunal la lena o lea e talanoa i ai le Tulafono Tau Faaofi lea. Ae i ai foi le isi tribunal na aumai i totonu o le Palemene e pasia ai i le tausaga e 2001 ina ia foia ai le faafitauli lea sa feagai ma le SASNOC ma le vaega lea a le Soccer, lea na tauaimisa ma tauau lava ina oo ai i le Faamasinoga e tau fofo ai o latou feeseeseaiga.

O le agaga o le Tribunal lena, ia faigofie ona i ai se itutino e tapā ai i tua se faaleleiga. E i ai la le Faalapotopotoga na faatea e le Tribunal lena i latou uma i le laulau ona o le isi lena mea e fiafia tele i ai le tele o laulau o Faalapotopotoga o Taaloga, e leai ni fonotaga faaletausaga e faia. Ae mafua lena e manao lava le laulau lea na i ai e nofonofo ai pea, nofonofo ai pea, ma nofonofo ai pea i ina, e leai la ni fonotaga, aua o fonotaga faaletausaga o i ina e sui ai tofi.

E pei la o le itu lena sa vevesi ai i le 2001 le SASNOC, e 53 le aofai o Faalapotopotoga e i ai, ae saili ifo, e leai lava ma se Faalapotopotoga o le 53 lena o toe resitala, ua faatetea uma e le MCIL ona e leai ni accounts leai ni faamatalaga o aiaiga uma o le Tulafono e le o tausisia.

O le mataupu lea i le Minisita, o lea lava e milimili lava i tulaga masani, e lafo mai lava i le Palemia na te faia le tofiga o lea tagata ma lea tagata e tauavea lea Matagaluega. E le o se mea fou la lau Afioga i le Fofoga Fetalai, o mea tuai lava o lea e i ai mataupu faavae a le tatou Malo. Ia na pau lena o mataupu sa laga e manaomia i ai se tali.

*Na faamaonia le lafo ma faitauina le Tulafono Tau Faaofi o le Ofisa e Faafoeina Moliaga Tau Solitulafono 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi o le Ofisa e Faafoeina Moliaga Tau Solitulafono 2015 i le Komiti o Mataupu Tau le Va i Fafu, Fefaatauaiga ma Tupe Maua mo le iloilo ma toe lipoti mai i le Fono Aoao i se Fonotaga o lumanai.

#### **TULAFONO TAU FAAOFI O TEUTEUGA O LE TULAFONO O FAASALALAUGA 2015 – faitauga faalua**

**Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Tekonolosi):** Faafeai i lau Afioga i le Fofoga Fetalai, e tulai atu foi i le agaga fiafia i le tatou Maota nei i lena taeao fou. A ua ou tulai atu lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faasalalauaga 2015 i lona faitauga faalua ma ou te fia tautala faamalamalama i ai.*

*Faaluaina e le Sui Palemia, Minisita mo Tupe Maua ma le Minisita mo le Soifua Maloloina.*

**Afioga Hon TUISUGALETAUA SOFARA AVEAU:** Faafetai. O le Tulafono Tau Faaofi lena, o le faamoemoe atu lava ina ia teuteuina ai le tatou Tulafono o Faasalalauaga 2010. O nai teuteuga taua o lo o faamoemoe e teuteuina i le tatou Tulafono Tau Faaofi lena, ina ia teuteu ai le Tulafono o Faasalalauaga 2010. O lo o taatia atu ai la i faavae ma taiala mo le faafoega o le vaega tau faasalalauaga e teuteu ai le mataupu o lo o i ai i totonu o le tatou Tulafono muamua. Ma ua atagia lena tulaga i totonu o le Tulafono Tau Faaofi e ala i le amanaia ai e faapea; e le o aiaiga o lo o i totonu o le Tulafono Autu, e le o aiaiga uma e tau i faasalalauaga. A o isi aiaiga o lo o i ai o aiaiga tau fesootaiga. O vaega la na e tatau ona teuteuina ina ia faamautu ma faamaoti i mea uma tau faasalalauaga aemaise ai vaega o mea tau fesootaiga

ma o la e i ai le Tulafono o mea tau Fesootaiga lava latou pei ona faataoto mai.

O le faamoemoe autu la lenei, ia faamaonia le tulaga lautele o auaunaga i e agavaa e avea ma auaunaga tau faasalalauga. O lona uiga, ia aveese le vaega o fesootaiga ae tau lava o latou ia o lo o nafa... mo se faataitaiga, i televise ma leitio. Ia faapitoa lava le teuteuga lea ina ia faatulaga tonu aiaiga ma puipuiga uma o lo o i ai mo i latou o lo o faia le auaunaga tau leitio ma televise e ese mai ai i fesootaiga lea e i ai telefoni ma tulaga faapena.

O le faatulagaina la o vaega na, lena e i ai le Fuaiupu 2 o le Tulafono Tau Faaofi, lena e aveese ai latou mai le aafiaga o mea tau fesootaiga. O le isi vaega taua o lo o i totonu o le teuteuga lenei, o le Vaega 2, ia aveese le uluai faasinomaga na faia ua le talafeagai ma le vaega tau faasalalauga.

Lona tolu, ia aveese le Vaega e 3 o le Tulafono lea o lo o faavaeina ai se Komisi o Faasalalauga e ese ai ma suia i le Komisi Faamasino o lo o i lalo o le Tulafono o Fesootaiga 2005. O lo o i ai i lalo o le Tulafono tele o Fesootaiga 2005 le Komisi Suesue, o le Komisi lea o Faamasinoga, a o lea foi o lo o taoto i le Tulafono tele Autu o Faasalalauga le isi foi Komisi, o le Trubunal e ave i ai mataupu e ogotia ai finagalo o tagata pe afai e tuuina atu se faatonuga mai le Komiti Faatonu ae le o atoa i ai lona talitonuga ma lona fiafia.

A o le teuteuga la lea ua i ai, o le a aveese ai le isi Komisi lea ma le Tribunal, le Komisi o Faamasino mai le Tulafono tele ae ua lava le Komisi o lo o i lalo o Fesootaiga. O le mea lava e tasi, aua o lo o i ai faatasi ma le Pulega o le au suesue faapitoa i faamasinoga ma o lo o taitai foi e le faamasino, o le tele lava o taimi o le Faamasino Sili.

O le Vaega 4, ia faalautele atu le sini autu i lalo o le Tulafono. O lo o fai lava si pumoomoo ma le vaapiapi o le tatou Tulafono Autu o lo o i ai nei ae ia talatala atu i tua e tusa ma le sologa o le soifuaga ua tatou oo i ai i mea tau leitio ma Televise, ona o lea ua silafia ua tele mai isi malamalama lea ua oo mai e faaoga ai tatou leitio ma Televise, ina ia ogatasi.

Ma le mataupu mulimuli e faaautu i ai le suiga lenei, ia manino le tuufaatasiga o matafaioi a le Pule Faatonu i lalo o le Tulafono o Fesootaiga faapea ma le tatou Tulafono lenei ua faatuina. O teuteuga la ia pei ona i ai i le tatou Tulafono Tau Faaofi e pei ona faataoto atu i le Laulau a Fono.

**FOFOGA FETALAI:** Malo faafetai i lau Afioga i le Minisita. E manatu ua faafofoga ma le atoatoa le tatou Maota i lenei taeao e ala i lenei Tulafono Tau Faaofi taua. E manatu foi ua lava se taimi sa tatou soalaupule ai i le tatou de-briefing ma faamalamalama ai e le Matagaluga le taua o le faatulai mai o lenei Tulafono Tau Faaofi ina ia taatia i lagatonu le tulaga tau Tulafono mo le Faasalalauga.

E matau atu e leai se sui usufono e fia saunoa. Ia, o le a avatu pea le avanoa i le tulaga masani. Tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI:** E momoli le faafetai i lau Afioga i le Minisita e tusa ai ma le Tulafono Tau Faaofi mo le tuufaatasia o nisi o Komiti. A o le vaega lea ou te fia fesili ai lau Afioga, muamua o le Vaega 5 i le tofiaina o le Pule Faatonu. Pe i ai se fesuaiga o i ai i le taimi nei ua toe tuuina mai ai nei suiga.

A o le vaega taua lau Afioga, o le vaega lea 16 o le Tulafono Tau Faaofi, lea e faapea mai ai, soloia i le fuaiupu lea, i totonu o le Fuaiupu 2, faiga faavae e faatino ai avanoa lautele, le mea foi lea o le universal access policy. O le vaega taua le vaega lea lau Afioga, ou te fia fesili ai pe aisea ua alu ese ai ma le Tulafono. O le vaega lea o le Tulafono lea sa i ai le mea lea sa ou taua ananafi i le tatou Fono ananafi, lea e aveese mai ai tupe foi nei mai kamupani tetele nei, pasene. O tupe la ia o lea e faamoemoe e fund ai pe faatupe ai le oo atu o auunaga faasalalau i tua ma mamao ese ma le taulaga. O tupe la ia sa faaoga i ai, o lea ua faafofoga i nisi o nuu e le i oo i ai, afai ua oo i ai, e mafai ona ola ai Televisi aemaise i le atu Aleipata ma nuu i tua. I lou talitonuga i leni taimi, ua leva ona tatau ona le toe i ai se faaletonu i lea vaega. Ua fia tausaga o i ai le tupe lea, pe aisea ua aveese ai, o le tupe taua tele le vaega leni i le Tulafono, e faamalosi ai kamupani tetele nei e pay se vaegatupe o latou polofiti e fesoasoani i le Malo ma lau Matagaluega e faaoo ai i tua auunaga nei.

O le fesili lea i lau Afioga, ona e taua tele le vaega lea o le Tulafono ua aveese pe aisea. O leni mea o le universal access, o se mea o lo o faamalosi i le tele o atunuu, ina ia mafai ai ona maua avanoa tutusa i Samoa ma so o se atunuu o le lalolagi, ina ia mafai ona oo atu i ai auunaga nei, aua e le mafai e le tatou Malo ona faatupe. Afai la e aveese le mea lea, ua le toe i ai se obligation mai kamupani tetele nei e aumai se tupe i totonu e tatau ona faatupe ai nei mea. O lea na outou silasila ananafi ma vaai i ai, afai e 2% lea e aumai i le gross profit a kamupani tetele nei, afai e \$1miliona le 2% ma le gross profit mai se tasi o kamupani nei, e tatau ona tatou tilotilo i le \$50miliona agai i le \$60miliona le latou polofiti i le tausaga. O se matua tupe tele tele lea tupe. O le mea lea lau Afioga, sa ou faapea e le aveesea ae faaopoopo, tuu i ai se 5% aua o tupe taua tupe nei lau Afioga e fesoasoani ia te oe ma lau Matagaluega e faatino ai galuega nei, aua e le mafai ona toe faatinoa e le Malo, aua o mea ia sa fai e le Malo o lea ua privatise ua maua ai latou tupe ma latou penefiti, e tatau ona i ai se latou saisaitiaga po o se latou noataga ina ia totogi mai se vaega o polofiti nei, e aumai e faatupe ai le Malo ma le faaleleia o le auunaga, ma faaoo ai i tua le auunaga nei. Ma le faaaloalo lava.

**FOFOGA FETALAI:** Ia, tulai maia, e manatu na o le pau lea o le sui usufono sa fia saunoa. Tulai maia lau Afioga i le Minisita mo Fesootaiga ma Faamatalaga Tekonolosi.

**Afioga Hon TUISUGALETAUA SOFARA AVEAU:** Faafetai mo le avanoa. O le universal access lea sa saunoa i ai le sui usufono mamalu, e sao. E pei ona fai atu nei o lea ua aveese. O le uiga o le upu aveese mai le vaega lea o faasalalauga, e aveese mai le Televisi ma le Leitio. O le taimi nei, o auunaga ia i le Televisi ma le Leitio, e le o totogiina, na ona e tago lava ki lau Televisi maua, ki lau leitio maua. O lea la ua aveese mai ia latou ia, aua afai e free le latou gaoioiga lea e fai ae toe totogi atu e latou impose e tatou le access, universal access mo latou, a o la e latou te faia le tiute e aunoa ma se totogi mo tatou ae toe faaopoopo atu i ai e tatou, e le o talafeagai la. A o lo o tumau pea ona i ai i totonu le universal access o lo o i luga o le vaega lea e faia le telefoni, aua foi o le tupe a latou lea e faagaoioia le pisinisi lea ia oo atu le malosi o le telefoni i tua i Falealili ma Aleipata ma Savaii. Afai la e le o

maua e latou na le telefoni i ina, o lea lava la o lo o i totonu o le auunaga lena le universal access e le o aveesea na o le Televisi ma le Leitio.

**Tofa Lealailepule Rimoni Aiafi:** Faafetai mo le faamalamalama a lau Afioga. E sao lau Afioga i le vaega lea, ae manatua foi le Televisi ma le Leitio, e le o free. E moni o la e free i le access a tagata i tua, ae le o free o la e togoti, ma e le faapea foi e oo tele i tua le TV.

Aua o le mea lea e tupu nei, i laisene nei e ave nei, afai lava ua fiafia le TV i lana ia income lea e maua i le taulaga e lava ai lana tupe alu, e leai la se application tele ia ia ina ia oo le auunaga i tua i isi vaega o le atunuu. Afai ae le oo i ai, o lona uiga e tatau ona i ai se fuafuaga a le Malo e sue mai se tupe o le latou polofiti e faaoo ai e le Malo pe afai e le faataunuuina e latou. Aua ua leva tausaga, ua autausaga, ua uma nei lenei Paeaiga o lauga lava nisi o sui usufono o le atu Aleipata

ma...i le TV e le o oo atu, ae e leai lava se galuega o faia i ai. O Fagalua, o la e nofonofo le sui usufono mo Fagalua ae e le o ola le TV. O le mea la lea lau Afioga, afai e le...aua e le popole tele le vaega lea e ave le access i tua i o, i lou lava lea talitonuga aua e alu ai a latou tupe. Aua o le infrastructure, e tatau ona fai e latou ma le infrastructure, afai la e leai o le a toe fai e le Malo le infrastructure, e tatau ona togoti e latou. Aua e uma ona fai e tatou le infrastructure ae o atu latou faaoga.

Lau Afioga o lou lea talitonuga e fesoasoani ai i lea vaega.

**FOFOGA FETALAI:** O lea ua ou maua le finagalo o le sui usufono.

**Afioga Lafaitale Patrick Leiataualesa (Alataua Sisifo):** Lau Afioga i le Fofoga Fetalai....

**FOFOGA FETALAI:** Malie lau Afioga i le Minisita se i avatu le avanoa i le sui mamalu.

**Afioga Lafaitale Patrick Leiataualesa:** Mo le faasaoina o le taimi o le Minisita. E sao lelei lava le saunoaga a le sui usufono mo Faleata Sisifo. E pei lava o le tele o taimi matou te taumafai atu ai foi i le vaega lea. O le matou talitonuga a faapea e le mafaia e le vaega lea na ave i ai le laisene lea, e tatau loa ona sue mai se isi kamupani e toe ave i ai se isi laisene... ave se laisene i se kamupani e mafai ona latou faasopolia le atunuu i TV. Ma le agaga faaaloalo.

**FOFOGA FETALAI:** Tulai mai le Afioga i le Minisita.

**Afioga Hon TUISUGALETAUA SOFARA AVEAU:** Faafetai. O le uiga moni lava universal access lea o lo o taumafai i ai. Afai nei tatou te tuu ai pea le universal access, o lona uiga o le a tigaina faalua pe faatolu le kamupani TV ma le kamupani Leitio. O le tulaga lea e i ai nei, a ave le laisene i le kamupani TV e i ai ona aiaiga uma lava 1, 2, 3, 4, 5, e tatau ona fai. O le isi aiaiga lena e i ai, ia o uma i Aleipata po o fea lava le nuu. O lea e i ai i i ia tatou, ia le Malo ia le avanoa e mafai ai ona sei loa le laisene pe afai e le i oo i Fagalua pe le i oo i fea... A o le fesili la, a se i nei la, ae a faapefea o tatou tagata la e fia lagona mai, la e fia matamata i le TV, e fia lagona mai le leitio?

A o la e i ai i totonu o le Tulafono le avanoa faigofie i le Pule Faatonu ma le tatou ofisa e aveese ai le laisene. Na ona tasi lava lua lau faatonuga i o i le kamupani TV e le oo lava, aveese loa le laisene ia. Ae o le a la le iuga o le aveese o le laisene? Ona faapefea lea ona oo le auaunaga i o tatou aiga ma o tatou nuu la e faafofoga mai? O le faigofie ia o le fuafuaga lena i le Tulafono ae faigata ona o le fetuutuunai foi i le fia maua e o tatou aiga o le tautua ina ia oo atu le fesoasoani. O le ala le faia lena. A o lea e i ai faaiuga, o lea foi e i ai Tulafono e aiaia ai le tulaga lena. Ae e ala ona fai le universal access, e tai pei la o le mea lea na e saunoa i ai, e tele tupe mama a kamupani telefoni, o latou la na e tataua ona totogi le universal access, o lea lava la o lo o i ai pea i latou na e le o aveesea. O la lava e i ai i lalo o le Tulafono, e totogi le latou tupe ina ia talafeagai ma le latou auaunaga.

**Tofa Lealaillepule Rimoni Aiafi:** Lau Afioga i le Fofoga Fetalai. Ou te le finauina le finagalo o le Afioga i le Minisita. O le mea lea e tupu lau Afioga, e faafofoga mai Samoa o lauga sui usufono iinei e le ola le TV e le ola le leitio. Ia te au e le o se matafaioi a le Malo le mea lea i le taimi lenei, o le matafaioi a tagata ia ua umia le laisene, e o e fai mea ia. Afai la o lea o le a aveese le malosiaga lea i le Malo, e mafai ai ona aumai tupe ia mai le TV ma le leitio ma ai lava, e fesoasoani i le Malo e ave ai le access i tua. O lona uiga la o lea ua matua tele le faaletonu. E moni lau Afioga. E le o i ai foi la ni fund. O le uiga o lau tala lea e fai atu, o mea lava nei, tatou te omai foi i le isi Paeaiaga, e toe o mai foi nisi sui fou pe a o mai e toe lauga uma foi i le access lea i le coverage. Ae e le o toe i le Malo le mea lea o lea ua ave i tua. O le mea lea e ala ai ona privatise mea nei ma out source mea nei, ia faatupe e latou e o fai le infrastructure e oo ai le latou auaunaga i tua. O lea la ua vaai latou, ua lava le latou polofiti iinei i le taulaga ma nuu lata mai, taatia pea nuu mamao ia, a le toe o la le Malo e toe fai le infrastructure e le mafai foi ona toe oo i ai le latou auaunaga. Ao lea la ua tau aveese ma le malosiaga lea e i lalo o le Malo, e faamalosiaga ai le totogi mai o tupe nei pe a le o e fai ni pou ma le access. E pei la o le mea lena e fai atu ai i lau Afioga taatia ai pea i totonu i i mo le puipuiga o tatou ma le agai i luma.

**FOFOGA FETALAI:** Malie lava lau Afioga i le Minisita, se i avatu le avanoa mulimuli i le sui usufono o lo o tulai mai.

**Afioga Lafaitale Patrick Leitaualesa:** O le ala tonu lava lena o le le toe agai o se matou tala i le vaega lea i le Malo. O le matou faamatalaga i le taeao lenei, e sao le Afioga i le Minisita o lea e tele lava nuu o le taulaga ma le tatou atunuu o lea e faasopolia. O le itumalo lenei, ua ova ma le sefulu ma ona tupu tausaga o matamata i le papatua o le TV. Ma le agaga faaloalo.

**Afioga Hon TUISUGALETAUA SOFARA AVEAU:** Ae leai lava se isi o oti ai. E le o feoti ai lava le tatou itumalo i o. O la lava e feola tagata. Ia faasaosao le TV, faasaosao le uaea la e i tua ma fai faalelei. E le aumaia le soona le sogasoga e fai ai le tatou Malo atoa. Mo le silafia e le tatou Maota, e lei aveesea lava se tupe mai le universal access talu mai ona amata le tatou Tulafono. Ona o le a? Sa tilotilo pea le tatou Matagaluega pe tataua ona fai pe leai. A tuu nei loa le universal access, e mautinoa lava ua leai ma le isi atunuu ua leai ma isi nuu, ua aveese uma aua o lea o le a tipi le totogi a le company,

ma sei faaola ai a latou mea ma sefe a latou tupe e totogi ai le latou universal access, ae e leai se mea o faia. O le mea lena a manatunatu lelei i ai, o le mea lena e tupu ai. O lea foi la e aveese i lenei taimi aua e pei lava ona ou fai atu. o la e i ai le tali o le faafitauli lena o le le maua o le TV i tua ma le le maua i fea. E faigofie lava ona fai le tali na ona faalua lava faatolu ona tusi o le Pule Faatonu aveese loa ma le TV. Afai e fai le mea le la i le taimi na faatu ai le tatou TV, ua leai se TV Samoa. E tasi lava lua tusi a le Pule Faatonu sei ma le laisene, o fea la tatou te matamata ai. O le mea lena o lea e puipui e tatou ina ia faatulaga ma faapaleni le tatou gaioiga. Ae saili mai pea tupe ia i latou ia e tetele tupe, e pei o le vaega ia e fai telefoni. O vaega na, internet o la e maua a latou seleni. O lea lava e taoto ma o lo o i ai pea lava le vaega o le universal access i totonu o a latou company na. Ae mo TV, o lea ua ou fai atu. E lelei foi saunoaga o lea ua faafofoga mai ai TV ma leitio, o matou lea e puipuia outou i le mataupu lea. E puipui e le Malo a outou kamupani, a ua leva ona tatau ona oo la outou auaunaga ma le tou tautua i tua i isi nuu ia e le i oo i ai.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai.

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Sa i ai le taimi na ma talatalanoa ai ma le Minisita i le tulaga tonu lava lea ua i ai le kamupani mai Fiti e fia ulufale mai i Samoa e faatu le latou TV ma sa fesili mai po o le a sou taofi. Ae o le mataupu tonu lava lea e laga, o i ina na faavae ai lou taofi, ma talanoa ma le Minisita. Aumai TV mai fafo. O latou ia e mafai ona oo i nuu ia e le o mafai ona maua TV. O le taimi lena, ua ova i le sefulu tausaga e le ola foi a matou TV i tua, TV 1, lea e o atu ai taaloga. Aua o le mea lava lena o lea e naunau i ai le tatou atunuu o taaloga ia lakapi a le Manu Samoa i fafo. O lea ou te malamalama lelei i le naunau o tatou uma lava i le fia maua o TV i tua. A o le tulaga foi lena, o lea foi e fai fuafua ia i latou foi aua, o le tele lava o a tatou pisinisi e vaivai. E vaivai i le tulaga i le itu tau tupe, a lea e tele lava foi ina faitio isi i kamupani Saina ia pe tasi pe lua e fai o latou faleoloa. O kamupani Saina ua sitiseni iinei. I le tulaga i le ola o a latou pisinisi, a o le mea lea e tupu nei i le tele o a tatou pisinisi e vaivai. E le gata e vaivai i le tupe ae vaivai foi mafaufau i le faagaioiga.

O le mea lea, o le mea e fai e tatou o le onosai. E faatau e le Malo le aufaipisinisi, ona o le aufaipisinisi pe na o le 10 pasene o le atunuu lenei. Ae e sili ai ona faatau e le Malo le 90 pasene o le atunuu lea e faaoga ia tautua nei. O lona uiga la a faatulaga loa oloa, o le a la le mea e fai e le Malo? E agai pea e puipui le vaega lea pe agai e fai le tautua mo le 90 pasene o le atunuu. O le mea lea o lea e tau faapaleni e le Malo. E talu lava ona fanau mai Atamu ma Eva ma fai a la mea faavalevalea ia na fai. O lea ua le paleni ai mea. Ae ana faapea e leai le mea lena, manu o faapenei o TV loaloa. Ae tuu maia le faatuatuga o lea lava e fuafua tatau atu, ona o lea e naunau le Malo mo le 90 pasene lea e le o oo atu i ai le tautua, ae fai vaai foi i le aufaipisinisi. O le tulaga lena, aemaise lava le sui usufono le e tu tu soo ma avaavau i le le alu atu o le service, a faaletonu loa kili latou ia. A o le mea foi la lena o lea e tupu nei, a liliu atu foi le Malo e fai le mea lena, ae o le a i ai foi isi o le a avaavau,



oi o le a outou vaai la i le vaega lena ae o le a faapefea le toatele lea. E faigata tele le tau faapaleniina o mea. Ae ou te faitio lava ia Eva.

**FOFOGA FETALAI:** E manatu ua manino ma malamalama le folasaga a le tatou Malo. O lea foi na saunoa... Ia le sui usufono mo Aleipata Itupa i Lalo, ou te manatu o le mea lava e tasi lea e te tau....Tulai mai le sui usufono mamalu.

**Afioga TAFUA MALUELUE TAFUA (Aleipata Itupa i Lalo):** E leai lau Afioga ma le faaaloalo. Faafetai i le Afioga i le Palemia ma le Afioga i le Minisita. O lea ua manino, e leai foi se isi e toe sii se matalalaga, nei te'i foi ua outou tutu ae tele mai ni a outou upu. O lea e malamalama lelei lava, o lea foi e faafofoga mai le itumalo i le mafuaaga. O lea ua ou tu atu ai ma le faaaloalo, e na ona faatepa o le Minisita i le...

E momoli atu le faafetai i le Afioga i le Minisita i le suiga lea e i ai vaega 3 o le tatou Tulafono, o lea ua faaopoopo i ai le b, a faasamoa e encourage and preserve, o lona uiga e faamalosi ma puipuia le culture diversity. E ese le taua o ia mea. O lea e momoli atu ai le agaga faafetai i lau Afioga mo le suiga fou lea ua faaopoopo i ai i le Tulafono. I luga atu la i le mea lea, i le Tulafono autu, o lea e i ai le (i) e puipuia le interest o audiences o le commercial uses of broadcasting services. O lona uiga a faasamoaina, e puipuia ia manaoga o tagata matamata e pei o matou lea e i tua. Na ona ou faatepa o lau Afioga i sini autu ia, ae ia alofagia. Ia faafetai, afai la o le mea lea ua tuai ai ona maua se matou .....o la e faafofoga mai le itumalo. O le a ou le toe lauga lava e oo i le faavavau, e toe fanau mai foi se isi Mesia fou, ou te le toe lauga lava. O lea o le a tui le mulipapaga ma tapuai. E masalo po o le vaiaso lea e ola ai le matou TV lea e faalogo mai le vaega lea a le Private Sector e tatau ona fai lea vaega.

**FOFOGA FETALAI:** E manatu ua logona finagalo. O lea foi ua saunoa malamalama le Afioga i le Minisita. E i ai se isi mataupu e te fia saunoa i ai lau Afioga i le Minisita ao lea o le a avatu le fesili.

**Afioga Hon TUISUGALETAUA SOFARA AVEAU:** Na ona tali e fesoasoani atili i le vaega lea. E pei ona saunoa le Palemia, fia maua lava le Atamu lea na sese ai mea ma le paleni mea mai le amataga. O lea ua saunoa le isi sui mamalu e faatauaina le vaega lea o le amanaia o tatou tu ma tatou aganuu i tatou faasalalauga. E pei la o manaoga ia o tagata o le atunuu o lo o faafofoga mai. E taua ina ia avatu ia feau ma faasalalauga i luga o TV ma le leitio. I le agaga faaaloalo ina ia tumau pea le tatou aganuu nai lo le soona faaoga o nisi gagana ae aafia ai le latou faalogologo. Faafetai foi i le sui mamalu o lea ua aumai lona finagalo e faatau atili ai le mea lea, aua o lena ua i ai le suiga lena i totonu o le tatou Tulafono Teuteu. E avea foi lenei taimi, o lena o lo o faafofoga mai

**Afioga Tafua Maluelue Tafua:** Lau Afioga i le Fofoga Fetalai...

**FOFOGA FETALAI:** Malie lava, sei fai atu le mataupu mulimuli a le sui mamamalu.

**Afioga Tafua Maluelue Tafua:** Lau Afioga i le Minisita o Fesootaiga. O le masina lea na tea nei. Ai na faasalalau atu ai i le TV le TV le tipiga o matou paipa i tua. Sa tipi la e 28 nai aiga sa motusia le suavai. O lea e talosaga atu ai ma lou agaga faaaloalo i le Matagaluega o le Suavai. A faapea o le a toe faasalalau foi le vaega lea, ona malie lea e avatu i le pulenuu tusi a aiga ia, ae aua le toe avatua i le Televisi, aua e leai se matou Televisi e maua, ma le faaaloalo, faafetai lava.

**Afioga Hon TUISUGALETAUA SOFARA AVEAU:** Faafetai. E ui ina e le o i le Tulafono le vaega lea, ae faafetai o lea ua molimoli atu le finagalo o le sui usufono mamalu.

O le fautuaga mulimuli sa taumafai atu ai, o lea ua avea lenei avanoa, e toe faafofoga mai ai a tatou kamupani TV, televise ma leitio faamolemole, o le faufautuaga lena ua tuuina atu, ina ia tau faaoo atu ia le auaunaga i nuu i tua e le i oo i ai, o lena ua aumai la outou fautuaga i isi mea, ae tele lava foi isi mea matou te talitonu e mafai ona outou faia ae le i oo atu lava, ma tou te le i faia, ma o le fautuaga e pei ona fai atu, o lea e i ai le tali i totonu o le tatou Tulafono ua uma ona taoto, ae o lo o popole lava e faaoga lena tali i te i ua mafatia, pei ona saunoa le Afioga i le Palemia. Ae ua tataua ona outou agai i mea ia e faaleleia.

Lau Afioga i le Fofoga Fetalai, ona maea atu lea o sa matou faamatalaga.

**FOFOGA FETALAI:** Malo le tofa i lau Afioga i le Minisita, e manatu ia lavapapale pea lo tatou Maota, tatou ave le faatuatuga o lo o i ai le tofa ma le faautautaga i le tatou Matagaluega ma le Afioga i le Minisita e ulimasao ai lenei faamoemoe, ae tatou onosai e le uma le fai aso o le Alii.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faasalalaua 2015 i lona faitauga faalua.*

**FOFOGA FETALAI:** E tusa ai ma le Tulafono Tumau o le a tuuina atu le Tulafono Tau Faaofi o Teuteuga o le Tulafono o Faasalalaua 2015 i le Komiti o Oloa Gaosi Tulaga Muamua, Mataupu tau Pisinisi, Alamanuia ma Leipa mo le iloiloa ma toe lipoti mai i le Fono Aoa o se Fonotaga o lumanai.

#### **TULAFONO TAU FAAOFI O TEUTEUGA O LE TULAFONO O FONO A NUU 2015 – faitauga faalua**

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai ma le paia o le Maota, ou te tulai ma le agaga faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fono a NuU 2015 i lona faitauga faalua, ma ou te fia tautala faamalamalama i ai.*

*Faaluaina e le Sui Palemia.*

**Tofa Hon TOLOFUAIVALELEI FALEMOE LEIATAUA:** Lau Afioga i le Fofoga Fetalai ma le paia o itu na lua o lenei Maota, ia o le mamalu lava

lea o le Palemene o Samoa ua potopoto, ma le maualuga i lenei taeao. A o le i faia se upu e uiga i le faamalamalamaina o lenei Tulafono toe Teuteu, ia tu ina ou sau i le va le tofa momoli foi a lau Afioga ua e faafeiloai ai i le atunuu ma molimea foi i faletui pei o lea upu, aua le alofa o le Atua ma le tatou fesilafaiga i lenei taeao, e talitonu foi e pei lava o le upu i Maauga ma Nuuasala, ua tu mai lagi au tofaga Tuiaana Tamaalelagi, ma o lea foi ua sasala faalagaali faiva o Tamafaiga e pei o fetalaiga i faiva o Fuefue lenei taeao matagofie i le agalelei ma le alofa tausii mai o lo tatou Matai i le lagi.

O lea la i le aso ma le faaaloalo lau Afioga i le Fofoga Fetalai, e tautala ai ma le faaaloalo i le tulaga o lenei Tulafono toe Teuteu, o le Tulafono Tau Faaofi o Teuteuga o le Tulafono o Fono a Nuu 2015. E pei ona silafia lau Afioga i le Fofoga Fetalai, o lenei Tulafono ua toe teuteuina o se Tulafono ua fai sina leva o le 1990 na pasia ai e le Maota le Tulafono lenei, o lona uiga ua silia i le 20 tausaga, peitai e le i moemoenoa le tamaloa o le fale Tuamasaga na moemanatunatu pea e ala i le mataituina i galuega fai a alii ma faipule i totonu o afioaga, e ala lea i le soosootauau ma sui o nuu ma sui tamaitai o afioaga, aemaise lava le Matagaluega ia ma le tatou Malo.

E maitauina pea galuega fai a alii ma faipule ma le mamalu o le tatou aganuu faasamoa, o lea o lo o tauaveina e fonu a nuu. O lea la ua ae ai se tofa i le tatou Malo i lenei tausaga 2015 ina ia teuteuina, o nei foi teuteuga e le tau suia ai le Faavae, ae pau lava le mea ia ogatusa pe ogatasi ia le Tulafono toe Teuteu ma le Faavae o le Malo o Samoa, e ala lea i faaiuga ma Tulafono Laiti ia po o iugafono foi a alii ma faipule o afioaga taitasi, ina ia faatumauiina ai pea le mamalu o le pule a alii ma faipule o saofaiga a matai i afioaga taitasi. O le Tulafono la lenei pe afai e pasia, o lona faamamaluina o le a faapena ona faatino ina ua tuu i ai le maliega o le Afioga i Lana Afioga Mamalu, O Le Ao o le Malo, ae e pei ona silafia o lenei Tulafono atonu ua silasila ane i ai sui usufono mamalu, ia o le tulaga lava ina ia faatumauiina pea le mamalu o pulega mamalu a alii ma faipule o afioaga ina ia usitaia ma tausisia e tagata soifua uma o afioaga po o tagata ese foi e oo atu i totonu o lea afioaga ma lea afioaga, ina ia aua ne i tau atagia le tulaga e faataaloga i vai le pulega mamalu a alii ma faipule.

O vaega la ua silasila i ai lenei Tulafono, ia o le tulaga o le faataunuina lea o latou faiga filifiliga ma faaiuga ina ia faataoto ni a latou Tulafono Laiti po o iugafono, ina ia ogatasi ma faiga faavae a lea afioaga ma lea afioaga, e tusa ma tu ma agaifanua, o tu foi ma aganuu o Samoa, ina ia usitaia e tagata uma. O lea la ua i ai le teuteuga lea o le Tulafono ina ia tausolomua alii ma faipule ona faataoto ni a latou faiga filifiliga o faaiuga aua tulafono e puipuia ai tupua taitasi i afioaga ina ia malu ma ia ogatasi ma a tatou tu ma aga faasamoa, i le vafealoaloai o tagata soifua ia ma le tausisia o le mamalu o pulega i totonu o afioaga, pulega lelei, pulega sagatonu, ma pulega amiotonu, ia ma pulega ia tausisia e tagata soifua uma.

O ia la faaiuga ma iugafono, ia e faia lava i luga o le filifiliga a alii ma faipule, e pei foi ona ou faailoa atu foi i se taimi ua tuana'i, e le o noatia ai ia le gasolo atu pea o le tatou Matagaluega i tulaga o le feiloai ma lea afioaga ma lea afioaga, ma faamanatu i ai tulaga o le taua o faiganuu lelei ma pulega o nuu lelei, o le maopopo foi lea ma le usitaia e tagata uma, e faaoga tatau o latou taimi mai lava i le taeao, seia oo ina goto ifo le la, a o latou o faaogaina o latou taimi taua ina ia ogatasi ma faaiuga ma tulafono a afioaga, e puipuia ai lea malae ma lea malae, o lea foi nuu ma lea nuu.

O ia la Iugafono ma Tulafono Laiti ia po o faiga faavae a afioaga, e ao lava ona lesitalaina, ia faasalalau ma lesitalaina, peitai o lea lesitalaina o le ua faatonuina i lalo o le Tulafono, ia lesitala uma nei faaiuga ma faiga faavae i le Matagaluega o Tina ma Tamaitai, le Atinae o Nu'u i Pulega Faalotoifale, ina ia faapena ona tuuina o se tasi i le Tulafono, ae amanaia e le Faamasinoga ia Tulafono nei ua faapena ona faamaopoopo ia ma tuufaatasia afioaga ma faailoa foi i afioaga, ma faapena ona amanaia e le Tulafono e ala i le Faamasinoga e pei ona i ai le Faamasinoga o Fanua ma Suafa, po o le Faamasinoga foi Faasolitulafono, aua o le a aiaia ai faasalaga, e oo lava i le tulaga i le faateaina o se tagata, e le fale i le finagalo o le nuu.

I lalo o le faavae, e le mafai ona faateaina se tagata i se mea tutunoa, e tatau lava ona i ai se mafuaaga e talafeagai e mafai ai ona faatea, ma e le o noatia la le vala lena, e tatau ona faatea le tagata amioleaga i totonu o le nuu, e tauvatea ai le nuu ma faalumaina le nuu, ia ma le usitaia le finagalo po o le pule mamalu a alii ma faipule. O lea la e taumafai ai lava le tatou Tulafono lenei, ina ia aloaia lea vaega o le soifuaga e ala i Tulafono Laiti o Iugafono, ia ma Faiga Faavae a so o se afioaga. Ua faapena foi ona aiaia ai le tulaga pei ona fai atu ina ia lesitalaina uma Iugafono ma Tulafono Laiti i afioaga i le puipuia lava lea ia malu totonu o afioaga, pei la o le tulaga foi lea e fai faasalaga a afioaga mo le tagata o lo o ula le marijuana, o lo o feaveai laau faasaina, ia o lo o umia se ituaiga fana foi lea e le i lesitalaina pe laiseneina e le Matagaluega o Leoleo a o lo o ona ia faaogaina pea, o mea uma lava na, e puipuia i lalo o le Tulafono lenei.

O le mea la lea lau Afioga i le Fofoga Fetalai, ia o tulaga uma na pei ona faaalii i teuteuga taitasi o le tatou Tulafono, aemaise foi i le tulaga lava lea ia ogatasi Tulafono ma faaiuga a alii ma faipule ma le faavae o le atunuu, e le toe suia ai le faavae, a o lena ia ogatasi ma ia usitaia ia aiaiga o le Faavae o Samoa i le tulaga o faaiuga a afioaga taitasi.

O lo o i ai foi le fuafuaga lau Afioga i le Fofoga Fetalai i le tulaga lava lea o le faiganuu lelei, ina ia faatumauina ai pea ia le matagofie, o le tumama, o le soifua maloloina, ina ia tausisia e tagata uma, e ala lava i faaiuga a alii ma faipule, ina ia faapena ona lelei ma sologa manuia ia le soifua i totonu o afioaga taitasi.

O lo o ia te au se lipoti mai le NUS, o lo o faailoa mai ai le finagalo o i latou foi o lo o faia suesuega i mataupu Faasamoa o lo o taua ai le tulaga o so latou finagalo i le faiganuu i afioaga, e le o talia ai le saofaga o tamaitai i totonu o faiganuu i suafa matai, aemaise foi o le fai o le suafa matai, ae le o auai i totonu o saofaiga o fonu a afioaga. Peitai, e le i televave se manatu i ai o le tatou Malo, ona e puipui foi i le tulaga ia le faatelevaveina lea vaega a o faafofoga mai le NUS po o le vaega o Aganuu Faasamoa i le Iunivesite a le tatou Malo ma le atunuu, ae o le a taoto ai faapea lo outou finagalo, ona e le faanatinatia se finagalo o lo tatou Malo, i teuteuga nei ua tulai mai i lenei foi tausaga 2015, e pei lava o le upu, e le i fausia Roma i se aso se tasi, ae o mataupu maaleale faapea, ia o le a taoto mai pea i le tatou Malo, se i faautagai foi ma afioaga taitasi, e tusa o lea vaega o so outou finagalo, a o se mataupu taua, a o lena ua ou folasia le tulaga e tusa o le Teuteuga o le tatou Tulafono lenei, e le o ni Teuteuga tele, peitai o le taua lava, ia amanaia le pule a alii ma faipule, ia usitaia e tagata uma, ia tumau le mamalu o le aganuu faasamoa i totonu o afioaga ma alaafaga taitasi.

Ia alofa mai le Atua ia fesoasoani i le faatofalaiga foi a lenei Maota, aua tulaga o teuteuga o lenei Tulafono Tau Faaofi o Teuteuga o le Tulafono o Fono a Nuu 2015, e pei ona faatulai mai le Tulafono Autu o le 1990.

Ia manuia tele lau Afioga i le Fofoga Fetalai, ia manuia foi lenei Maota, ia matou ola i le alofa ma le agalelei o le Atua.

**FOFOGA FETALAI:** Malo. Ia faafetai i le tofa manino i lau Afioga i le Minisita, e manatu o lea ua talatala ma le la lou finagalo, ma ou te talitonu foi ua faafofoga ma le manino lenei Tulafono taua – ma e maua luga foi le taofi ua manino le folasaga a le Afioga i le Faauluuluga o le Matagaluega sa folasia lenei mataupu i le tatou vafaafeagai ai i le tatou De-briefing masani. Ia a o le avanoa masani, e tulai mai ai sui usufono mamalu e fia saunoa.

Ia se i tuu atu muamua le avanoa i lau Afioga i le Palemia.

**Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o le toe Teuteuga lenei faaopoopo, e taua tele ma e faavae i nisi foi o tulaga e atagia pea iuga a afioaga e tusa ai ma Tulafono foi a lo tatou Malo, o lona uiga e taua tele.

O lea foi ou te manatua i le taimi sa fotuai mai ai le Tulafono lenei i le Maota lenei, sa tele lava le tetee aemaise lava le Faalapotopotoga a Loia, ona e i ai le taofi foi lea, o tu lava ia ma aganuu a Samoa e le tau faatulafonoina, o tu ma ana aga e le tataua ona faaupuina i Tulafono ae alu ai pea faaleiloga faapea. E le i ioeina e le Malo i lena taimi e le Afioga i le Tootoalii ma le Kapeneta, ona o le manatu i le tatou tu ma agaifanua e auga lava i le fono a matai ma le pule o lo o exercise e matai, ma e ono tulai mai ai foi le fetotoai ma le felautoai ma le Faavae. Ma o le tele foi o afioaga ua oo lava ina oo atu i ai le malosia o le Tulafono ona o nisi o faaiuga fai i totonu o fono a nuu ma le aiaina o aiatatau lea e i totonu o le Faavae. O le tulaga foi o Tulafono faavae, lena o lo o manino ai le itu o le amanaia o talitonuga faa-Kerisiano ma tu ma agaifanua. Ua tele la ina sese ai le tele o afioaga, ona o le tauave lava i le tulaga foi lea literally upu na, ma e le o malamalama i ai le toatele. O upu na e faatatau i talitonuga ma tu ma agaifanua, o talitonuga faa-Kerisiano, o la e i totonu o upu tomua, e le o se vaega o le Faavae. O lona uiga la, na o se taiala, ae le faapea o i ai se malosia faale-Faavae o i ai.

E taua lava itu nei ina ia malamalama ai i le Tulafono Tau Faaofi lenei lea ua faataatia, o le isi lea laasaga taua mo le faatauaina ma le faamalosia o faaiuga e fai i totonu o nuu. O le pepa lea sa aumai sa taua ai le Iunivesite, ua uma ona ou faitau ai e tele lava mea sese ma mea valea lena e i ai i totonu. Na o le tasi lava le nuu, o le nuu o matai. E leai ni nuu o ni taulelea, leai ni nuu o tina. E sosolo mai lava i matai le nuu, o lea foi ua i ai ma tina ua avea ma matai e saofai i totonu o le fono a Matai, e sau lava i ina faaiuga fai e mulimulitai uma i ai tagata o le nuu. Ae ou te le iloa po o fea e oso mai ai le manatu lea e ese le nuu o taulelea ese le nuu o tina. E tasi lava le nuu na o le nuu o matai e faataoto mai ai taiala e mulimulitai e le malosia o le nuu ma i latou uma i totonu o le nuu.

A o le faatinoga o tonufai, e le aveesea le tulaga o le consultation i totonu o le faasoa tataua. E i ai taimi ou te tapa ai foi au i matou fono o nisi o Nuu o ou matai ai e valaau tina e omai, e logo mai le nuu po o le a le tulaga lea ua i ai a latou polokalame. O mea manaia mea ia, aua o le tulaga lava ia o taulelea, e

tele lava o fonotaga pe alu alu le fono ona faaiua lea i le valaau o taulelea e omai e avatu i ai le upu a matai, o le faatonuga i mea e tataua ona fai.

E i ai itu taua lea e aumai i totonu o le Tulafono Tau Faaofi lenei, o lea e i ai le anava e masani ai fono a matai, a oo ina sala se tagata, e le fesiligia le ua molia i sana faamatalaga. O le tulaga lena o lea ua avatu i le Tulafono Tau Faaofi, e tataua lava ona fesiligia se i malamalama, ona fai ai lea o le faaiuga, fai ma le malamalama le faaiuga a alii ma faipule. Ae i ai lava le anava e faapea, e le fesiligia alii ma faipule, a molia mai loa, fai loa ma le iuga. O lea la e aumai i le Tulafono, e tataua lava ona i ai se avanoa e fesiligia ai le ua molia. Afai foi e i ai ni molimau, o tulaga taua lava na e tataua ona fesili i ai le nuu, aua a oo loa ina aumai le mataupu i le faamasinoga, o mea tetele la ia e tua i ai le faamasinoga, ma puipui atili ai le faaiuga ua faia e alii ma faipule. O le taiala e masani lava ona ou faalogo i ai, e oo lava i le Atua soifua na faia tatou, na ona sasi lava o tatou uluai matua, na fai lava le faamasinoga e le i faapea e le i faia. O le faamasinoga muamua lava lena na mulimulitai uma i ai faamasinoga a le lalolagi. Sa fesili lava le Atua ia Atamu ma Eva i le mafuaaga ua la faia ai le gaoioga le talafeagai ma le Poloaiaga a le Atua. Ona ua uma lelei lava ona fai o le la faamatalaga, ona fai loa lea o le faaiuga, o lea la ua le paleni ai mea uma o le tatou soifuaga ma le tatou olaga o lo o i ai nei ma tele ai mea tau fufulu. Mai lava i le faaiuga o le faamasinoga muamua, o le faamasinoga na faia i le va o le lagi ma le lalolagi.

Lau Afioga i le Fofoga Fetalai, o le taua ia o le Tulafono Tau Faaofi lea i le vailiua lava lea, a o le i faia le sala, e tataua lava ona malamalama alii ma faipule i le tuuaiga, ma e tataua foi ona tapa ni faamaoniga aua a fai pogisa le faaiuga, o i ina tonu lava e toe faalumaina ai le tofamamao i alii ma faipule, pe a sulufai mai le tagata lea e aumai mataupu i Mulinuu, o lana aiatatau lena o lea e faataoto i lalo o le Faavae o le Malo o Samoa.

Lau Afioga i le Fofoga Fetalai, o le toe faaopoopo atu lena ona o le taua o mataupu ua oooo lava i ooooga o tulaga e faataua atili ai faaiuga a alii ma faipule e faalagolago i ai le tatou Malo mo le pulea o tatou nuu i luga o Tulafono ma le nofo lelei.

Lau Afioga i le Fofoga Fetalai, o le toe faaopoopo atu lena i le Tulafono Tau Faaofi.

**FOFOGA FETALAI:** Malo faafetai. Ia, malilie sui usufono mamalu o tulai mai avatu muamua le avanoa leaga o lea e afio i luma ao sinasina o Salafai.

Se i tulai mai Papalii ona avatu ai lea o le avanoa.

**Tofa Lealailepule Rimoni Aiafi:** Lau Afioga i le Fofoga Fetalai, na ona ou fia pai lava i le lauga a le Palemia, ae ou te le lauga.

**FOFOGA FETALAI:** O lea o le a avatu le avanoa Lealailepule. O lea o le a tatou faasolo i felafolafoaiga masani. Aua e te popole e avatu lava le avanoa.

**Tofa Lealailepule Rimoni Aiafi:** E te saunoa mai loa e aua ou te popole, ou popole loa.

**FOFOGA FETALAI:** Se i tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai, tofomalie e le ulutoina le tofa i lau Afioga i le Nofoa, o oe lava e te pulea Taulumaga a le Maota. Ou te le iloa po o pe le uati po o la pe sao. E lafo atu ae... o le tulai atu lea ma le faaloalo.

**FOFOGA FETALAI:** Aua e te popole, ua fetuunai le tatou polokalame o le aso ona o le tulaga o le tatou malo o lea e faatali. Ae malilie sui usufono e le o se taimi umi. O lea e faaauau le tatou Fono seia taunuu mai le tatou Au ona fai lea o tatou upu, ona tatou alo ai lea i le tatou taumafagati faatasi.

Tulai mai le sui usufono mo Faasaleleaga Nu.2.

**Susuga PAPALII LIO FAAVAIOMANU TAEU MASIPAU (Faasaleleaga Nu.2):** Faafetai tele i lau Afioga i le Fofoga Fetalai mo le avanoa. E momoli foi le faafetai tele i le Afioga i le Minisita ona o le faamalamalamaina o lenei Tulafono taua i tatou Nuu. O lea foi ua faaopoopo le Afioga i le Palemia, atonu o le agaga lava lea o tatou uma ua avea foi ma Taitai o tatou nuu ae faapea foi le tatou Fono, o le faatauaina o tatou nuu, aemaise lava le Fono a Nuu. I le vaavaai ma le maitau i le Tulafono Tau Faaofi, e taua tele. O le taua o lenei Tulafono Tau Faaofi i lau vaavaai, o le faamalosiga o le malosiaga o le Fono a Nuu. i le vaavaai i ai, aua e i ai lava isi mea sa popole i ai i aso ua tuanai, a o lea ua faataatia mai, aemaise lava vaega ia e 14 lautetele lea ua aumai i totonu o le Tulafono Tau Faaofi, ua tuu ai le malosiaga lautetele i alii ma faipule mo le faamalosia o nuu, aemaise foi o le mataituina o itu taua aua le lumanai manuia o tatou nuu.

I lau lava vaavaai i ai, ua manaia vaega lautetele e 14 lea e i totonu o le Tulafono Tau Faaofi lea. O lea ua i ai i totonu le malosiaga. E moni lava e le o faamatala maia mea taitasi pe a, a o lea ua i totonu i le malosiaga. A o le agaga o lou tulai atu lau Afioga i le Fofoga Fetalai, o mea ia tau resitalaina o iugafono a tatou nuu. Ia manatua foi lau Afioga, o le mea foi lea sa oo i ai le saunoaga a le Palemia, na pau lava lea o le atunuu ese i le lalolagi, i mea o ana iugafono, e teu i mafaufau o tatou o matai. Ioe.

E pei o le agaga lena i lau vaavaai i ai, o lea ua faataatia mai le Tulafono Tau Faaofi, a o mea lea e agai i ai sou manatu lau Afioga i le Fofoga Fetalai, ua toe ave foi le resitala i le Matagaluga o Tina. E leai e le o se isi lava itu, ae pei o le agaga, pei o lea o le a tatou ave foi tatou iugafono ma faaiuga o tatou fono e resitala i se Ofisa. Aua o aso ia sa resitala i le Ofisa o Faamasinoga o Fanua ma Suafa, o lea ua le toe i ai. A o le agaga lea e tau avatu, e talitonu lava o tatou faiga faavae ma tatou iugafono e tumau lava lona mamalu, e le tau tusitusia foi pe faia i ni tusitusiga...

**FOFOGA FETALAI:** Se i avatu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, na o se mea lava e fia faasao. O aiaiga o le Tulafono Tau Faaofi lena e fai mai, e mafai ona resitala. Ae le faapea o le a avea le le resitalaina e le faatauaina ai, le mea tonu lava lea e te aumaia. Ae i ai le itu taua o le resitala, nei t e i ua oo ane i se taimi mulimuli

fai le faaiuga ae molia le nuu e se ua afaina. O le mea la lena e taua ai le resitala, o se mea e tua i ai le nuu pe a oo i le taimi ua lagalaga ai, aua e i ai lava le moemoenoa ma le laufaleaina i totonu o nuu latou te fesiligia le tofa ma le faautautaga. Afai la le faamasinoga ae e oo atu avatu fofoga, e mafai lava ona finauina, e leai se iuga faapena. A o se mea foi lele e resitala ma ave ma le kopi i le Ofisa o le Faamasinoga o Fanua ma Suafa, e mausali atili ai le iuga e puipuia ai le faaiuga matagofie a alii ma faipule ua fai. A o lea lava e i totonu o le Tulafono Tau Faaofi, e le faapea o le a avea le le resitalaina, o le a faapea ai o le a le aloaia le iuga a le nuu. Ae pau lava le mea, e lelei le i ai o se mea faapena e tua i ai le nuu pe a oo i le taimi e lagalaga ai se faaiuga e fai ua fesiligia ai le tofa ma le faautaga.

**FOFOGA FETALAI:** Malo. Tulai mai le sui usufono mamalu mo Faasaleleaga Nu.2.

**Susuga PAPANII LIO FAAVAIVAIONANU TAEU MASIPAU:** Lau Afioga i le Fofoga Fetalai, atonu o lea lava e manino i le Tulafono Tau Faaofi. Aua ou te le iloa, e sili atu le malosiaga o le tatou Tulafono Tau Faaofi lea pe a pasia nei mo iugafono ia e ave e resitala. E pei o le uiga lena o lou manatu, aua e i ai taimi o lea foi e faataga mai e mafai ona fesuisuia. Mo se faataitaiga, a faamau nei i i mo se faataitaiga, e 20 aumatua le sala, ae te i ua toe talosaga se isi vaega o le nuu ua mamafa tele lena faasalaga. Ia o le... e toe o uma lava la i le Matagaluega o Tina se i toe faaulu mai i tua mea ia ua resitalaina. A o le uiga o lou manatu, o lea ua taatia mai i i, o le malosiaga lea o le Tulafono Tau Faaofi.

**Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi:** Lau Afioga i le Fofoga Fetalai, na pau lava le mea foi lea, ia manatua foi e le eseese taimi e fai ai, e tasi lava le taimi e fai ai, a alu atu loa le togisala, alu atu ma le vaesala. E leai la se mea e eseese ai faamaumauga. Aua o le taimi lava e sau ai le togisala, e le ua tofia e togisala, o le taimi foi lena e sau ai le vaesala mai le matuatala.

**FOFOGA FETALAI:** Ia, e manatu ua manino, e le tau aumaia uma a tatou mea i o, o la e lava e soalaupule i le taimi e fai ai faasalaga, o le togisala ma le au vaesala ma mea uma na. Ae tulai mai le sui usufono e saunoa.

**Susuga PAPANII LIO FAAVAIVAIONANU TAEU MASIPAU:** Ia lelei. O le isi foi mea, o tatou uma lava tatou te manumanu i faiga faavae o nuu, o mea na e teu mau lava i le tofa ma le faautaga a nuu taitasi, o le agaga lena na ou tau avatua, o mea ia e teu mau lava i afioaga, o tatou uma lava o matai i totonu o saofaiga, e manumanu foi e vaavaai ai nisi tagata, ia o lea la o le a matamata i ai le CEO o le Matagaluega o Tina ma Tamaitai i faiga faavae a le nuu, o mea faapena...

**FOFOGA FETALAI:** E manatu ua malamalama lou finagalo le sui usufono mo Faasaleleaga Nu. 2, se i tulai mai lau Afioga i le Minisita mo Tina ma Tamaitai, Atinae o Nu ma Afioaga ma Agafesootai.



**Tofa Hon Tolofuaivalelei Falemoe Leiataua:** Lau Afioga i le Fofoga Fetalai, ua ou alofa o le toeaina nei o le loia toe sa sui komesina o leoleo, a o lea e foliga mai, o le upu foi lea faaperetania o le ignorance o lona uiga, e le o malamalama lava le toeaina i le mea lea e taumafai atu ai le Afioga i le Palemia, o le manaia ia o le folasaga a le Afioga i le Palemia. E manatua afai ua faamau le sala e 20 aumatua, ae e tali mai le tagata i le finagalo o le nuu e 10 aumatua, o le tofa ma le faautautaga tataua lena a le nuu, leaga o so o se nuu lava e i ai le alofa, e le tulia le 20 lea, o lea tatou te iloa le tulaga o faasalaga i afioaga, e ave lava le lesitala, ona o le mea lena e taua ai pe afai e oo i le Faamasinoga se mataupu, a o lea ua ou fai atu, ia o lo matou nuu, ia a fai lava le faasalaga e \$2,000 ae sau na o le \$500, e tasi lava le upu a le nuu, se o le mea sili ua e tali mai, ae ia fua se tapu ma ia faamuta matagi i lou tautalaititi ma e soona faatasina le nuu, ia o mea uma faapena, a o le Tulafono lea ua fai, e pei o le upu faasamoa, o le aso ma le filiga, o le aso ma le mataigatila, e au i le tauola e au i le fagota, e le soifua uma alii ma faipule, vaeatu lava le lagi soifua o tupu ma ee o afioaga i lea taimi i lea taimi. Afai la e fai le mea lena e te fai mai ai, o se matua tofa vaivai lava le tofa a Faasaleleaga lea e te tauavea. O le a faapefea ona le faamauiina? E tataua ona faamau o le taimi o lea ua tatou tusitusi, o lea ua ta i komepiuta, ua fai uma mea uma, ua faatino mea uma i le potu faaneionapo, e tataua ona faamau, ave i o i le matou Matagaluega ona o le Matagaluega o Pulega faa-Afioaga.

O le Pulega faa-Lotoifale, o lea e tausia ai le tulaga o pulega a alii ma faipule, o le mea lea ou te faamalie atu ai i le sui usufono mo Faasaleleaga Nu. 2, malie ia tuu lou finagalo, ae fai le mea ua fai atu le Malo, se i e sau foi oe e te tago toe sui le Tulafono, ia ona fai lea o lou finagalo lena, ae o le a toso ai lava le tatou mataupu, ae o se mataupu vaivai lea e te taumafai mai i ai, ma le faaaloalo.

**FOFOGA FETALAI:** Ia se i tulai mai...o lea o le a faauma atu ona tuu atu lea o le avanoa le sui usufono mo Faasaleleaga Nu. 4, tulai mai le sui usufono e faaiu mai i lea ua manino lou finagalo.

**Susuga PAPANII LIO FAAVAIVAIOMANU TAEU MASIPAU:** Ia faafetai. E leai o le agaga lea e avatu, o le access fua o isi i tatou faaiugafono, pei o le agaga lena, leaga o lea ua i ai le avanoa o le Matagaluega, e vaavaai ai foi i iugafono ma faaiuga a nuu taitasi, pei o le uiga lena o lou manatu, ae le o se faaleaogaina o le tatou Tulafono.

O le isi mea o lea na saunoa foi le Afioga i le Palemia na saunoa foi lau Afioga, e le amanaia e le faavae ia mea, o le isi tulaga e access foi i ai le public le atunuu lautele i mea ia pe a ave i ai e le Matagaluega. O le agaga lena o lo o taumafai atu ai lou manatu, o le taofiofi mamau i measina a o tatou nuu.

O lona lua lau Afioga i le Fofoga Fetalai, ona ou oo mai lea i le isi vaega lea, o lea ua saunoa le Afioga i le Palemia i le mea lea, o lea ua maua le avanoa ma i latou o e solitulafono, manaia tele le avanoa lea ua i ai....

**FOFOGA FETALAI:** Se i tulai mai lau Afioga i le Minisita.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai o le mea e fia faasao. O le faaupuga lea a le sui usufono mamalu e

faapea, o lea ua fai atu e le amanaia e le faavae, leaga e mau lava ē e faalele maua ē e matau, o le upu na fai atu, e le tau suia ai le faavae i le Tulafono toe Teuteu lenei, as long as, e ogatasi ma le faavae, e le tau teuteu ai se faavae, e le faapea la e le amanaia e le faavae faasalaga a afioga, oi a faapefea, o pulega a alii ma faipule? Lea ua i ai le Tulafono lea e lagolago ai le faavae, pau lava le mea aua le feteenai ma le faavae, o se tulaga tonu lena. Ae le faapea e le amanaia le faavae, e sese i Sini lea mea, ma le faaloalo.

**FOFOGA FETALAI:** E manatu o lea ua malamalama lea finagalo.  
Tulai mai le Afioga i le sui usufono e faaauu le saunoaga.

**Susuga PAPANII LIO FAAVAIVAIOMANU TAEU MASIPAU:** Ia leaga o lea ou te faitau i le Tulafono lea e mafua ai ona fai atu lau tala lea, e le o faaogaina i le vaega o le faavae lea e sau i le vaega o le Tulafono.

O le ala lena o lea e faamanino, e le faapea ou te fai fua atu, o lea ou te fai atu o lea e i totonu o le Tulafono. O le agaga lea pei ona.....ia pe a fia talitonu lau Afioga o le a faitau atu.

**Tofa Hon Tolofuaivalelei Falemoe Leiataua:** Ma lou faaloalo lau Afioga i le Fofoga Fetalai, e matua le tonu le mea lea e saunoa i ai le sui usufono, na pau lava le mea lea e i totonu o le Tulafono, ia ogatasi ma le faavae, ia ogatusa ma le faavae mea uma, i lalo o le Tulafono lenei le pulega a alii ma faipule, e leai se mea e faapea mai, e le amanaia e le faavae. Ia ma lou faaloalo e tatau lava ona...pei lava ona ou fai atu o le loia le toeaina.....between the lines.

**FOFOGA FETALAI:** E manatu o lea ua manino le faamalamalama a le Malo e a ia le Tulafono.

O le a avatu le avanoa i le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, o le mea e fia faamalamalama, o lea ua taoto le Tulafono, se i malie mai lau Afioga i le Minisita, se i fai atu pea lauga a lenei itu, a lea ua taoto le Tulafono, o tulaga lava e i ai, o manatu o lea e avatu e faatupu manatu, a o le Tulafono lea ua taoto, e le mafai ona matou toe suia. Malie mai e tuu le avanoa i sui usufono mamalu.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai o se mea e fia faasao. Leaga o le mea lava lea e tutulai mai ai le Taitai o le Itu Agai, pei o ia e faatonua le Malo i tulaga o latou tiute fai, a o lea e afio lau Afioga, o lea ua e faatagaina o lea ua avatu, a o le mea e fia faasao, e tatau ona faasao lava i le taimi lena. A o lea e saunoa mai, o le le malamalama, e ignorance foi le tamaloa lea, e le malamalama i Tulafono ma le iloa faaliliu Tulafono. Ma le faaloalo.

**FOFOGA FETALAI:** Ia le sui usufono mo Faasaleleaga Nu. 2, a i ai ni ou alofa i le tatou galuega e manatu o lea ua aumai le tali a le Malo, o lea foi ua ou avatua le avanoa se i logona a outou fautuaga, ia ona taatia lea i le Malo i le mea e tatau ona fai.

Tulai maia e faaiu mai le saunoaga.

**Susuga PAPALII LIO FAAVAIVAIOMANU TAEU MASIPAU:**

Faafetai i lau Afioga o lea ua....o le a ou see ese i vaega ia.

Ae o le isi vaega o le Tulafono lea e i totonu i i, e faapea mo le fausiaina o tatou foi lele mo le atunuu lautele, tai pei o falesa e aofia ai ma faleoloa, tasi lena mea o lea e aafia i totonu o le Tulafono lea.

O lou popolega mo se faataitaiga, e toe afaina ai foi le tatou Tulafono, i se tagata foi lea ua i ai sona fanua tele lava ua fia lisi, maua loa lana uo Saina foi lea faipisinisi, ia avatu loa i o e lisi ai le mea lea ma fai se faleoloa aua le atinaeina o aiga aemaise foi o le faaaogaina o eleele. Ia fono loa le nuu, o la e saofai tama foi ia faipisinisi i luma, a, faapea loa, ia e tatau ona taofi le mea lea e a, ma a, ma a. Ia o mea faapena aua e ono tupu, e ono tupu i le lumanai mea faapea, e pei o lau lena vaavaai i ai i le isi vaega lea o le Tulafono. E a pe a aveese faleoloa? Ua lava hall a nuu ma lotu ma mea faapena, ae aveese faleoloa.

**FOFOGA FETALAI:** Saunoa mai lau Afioga i le Minisita.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai, o le mea e fia faamalamalama i le sui usufono, ona o lea ua oo i ai lana saunoaga, ae lelei le faamalamalama i le taimi lenei, atonu po o i ai foi nisi sui usufono e le malamalama i le Tulafono ma lona faauigaina, ia o le a noatia ai lena sese o le a toe faaopoopo mai foi.

Lau Afioga i le sui usufono mamalu vaeatu le ee o le Maota ma le Afioga i le...o le vaitaimi lenei e talu mai ona tatou feagai ma Afa ma le Tsunami, o lea ua i ai ia polokalame foi ia a le Malo i Evacuation Centre, a, ua e vaai ai i le Tulafono, for community purpose, e le o se fale mo oe lava ia, e leai, e tatau ona consult le afioaga ina ia malu le tulaga o le fausia o se fale faapea, fale e faaoga e le afioaga i taimi o afa o mea uma faapena faanatura, o disasters e feagai ma tatou, o i ina e tatau ona o e faaoga, o lea la e i ai le fuafuaga lea.

O le mea lea i le faleoloa lea e te saunoa ai, o le tagata foi lea e nofo i le eleele umia saoloto o lona lava eleele, a o la e i totonu o le afioaga ae fia fai sona faleoloa, e tatau ona maua le lagolago a le nuu, tatau ona maua. E mafua aisea? A o atu la tagata tauai le faleoloa, o le tagata lea e nofo i le freehold land lea, ona ua fai lava lona faleoloa, aua e mafai lava ona fai lona faleoloa, e le tau...ae o le tulaga o le aganuu faasamoa, o le puipuiga, o le malu, o le filemu, ma tausisia ai le tulaga o le lagolago a le nuu, aua le tulaga o lea foi ituaiga atinae, o ituaiga atinae la na o lea e tautala ai le Tulafono. O polokalame foi ia mo ni polokalame e faaoga ai se vaega eleele o se aiga mo activities foi ia pei o le faamalositino o mea uma faapena e ta ai le laau i le vaveao ma le afiafi, o activities faapena. E mafai ona tapa le finagalo o le nuu e ala i le alii pulenuu, ina ia ioe le afioaga e faatino mea uma na, aua ne i aliali ai se vevesi, aua ne i solia ai le mamalu o le nuu, ia iloa taimi e tatau ona fai ai. Ia o le tulaga lena o le tagata o la e nofo tonu lava i le nuu, e tatau ona ia silafia, o tatou o matai, na ala ona fai le matai, o le nuu, nofo i le nuu, ae aua na o le fai lava o le matai alu i le taulaga nofonono ai ia ma faaali ai le malamalama, ae le o iloa le soifuaga i totonu o afioaga, le community purpose lena o lea e moomia ai le consultation ia po o le soalaupule ma le afioaga, tau i ai, a ioe le afioaga, o le malu lena o le maota lena, o le malu lena o le faleoloa lena, ma le faaaloalo.

**FOFOGA FETALAI:** Ia malilie lava sui usufono o lea o le a....le sui usufono mo Faasaleleaga Nu.2, e talosagaina e faaiu mai lau saunoaga o lo o tele nisi o sui usufono o lo o fia saunoa.

Ia malie, se i avatu le avanoa i se tasi o sui usufono mo Aana Alofi Nu. 1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi (Aana Alofi Nu. 1):** Lau Afioga i le Fofoga Fetalai, leai ua ou tulai atu e momoli le faamalo ma le agaga faafetai i le Afioga i le Minisita, ae talosagaina sou avanoa umi e toe fai ai e faamalamalama atili lau saunoaga lea ma mataupu uma ia, e aoga mo sui usufono o le Palemene i se taimi pe a maua se avanoa, faafetai.

**FOFOGA FETALAI:** Tulai mai le sui usufono mo Faasaleleaga Nu. 2 e faaiu mai le saunoaga, ona tuu atu lea o le avanoa i sui usufono mamalu o lo o fia saunoa i le Tulafono Tau Faaofi.

**Susuga PAPALII LIO FAAVAIVAIOMANU TAEU MASIPAU:** Faafetai, faafetai i lau Afioga i le Fofoga Fetalai, atonu o lea ua maua le finagalo o le Afioga i le Minisita, na o faleoloa i fanua umia saoloto, a o lona uiga, o lea lava e saoloto o tatou fanua faaleaganuu, o le uiga lena o lea ua saunoa manino le Afioga i le Minisita o i latou o umia saoloto i totonu o afioaga, a o tatou lava ia i o tatou fanua faaleaganuu, o lea ua saunoa le Afioga i le Minisita, e leai e le afaina i le Tulafono, faafetai.

**FOFOGA FETALAI:** Malo faafetai. Sa taumafai mai le sui usufono mo Faasaleleaga Nu. 4, ae leaga o lea o le a lafo i lea itu o le vai, malilie sui usufono o le a felafai le tatou galuega, le sui usufono mo Faasaleleaga Nu. 4 sa e fia saunoa?

**Afioga PESETA VAIFOU TEVAGA (Faasaleleaga Nu. 4):** Faafetai i lau Afioga i le Fofoga Fetalai, e matagofie lava le saunoaga a le Afioga i le Minisita, ae pei na tau agai atu se manatu ona o le tulaga lea e uiga i fanua foi i totonu o afioaga, ona o lo o i ai tulaga foi ia o lo o tupu tele i totonu o nuu ma afioaga, tai pei o ni fanua foi nei e le o ni fanua mavae, a o fanua foi nei ua fai i ai tofiga pule mamalu a alii ma faipule i lea matai ma lea matai. Ae pei o le tulaga lea na ou fia malamalama ai lau Afioga i le Minisita, o le a se silasila i ai a le Matagaluega, aua o lea ua aumai le fanua i le matai, ae a i ai se tulaga foi lea o se solitulafono a le matai ae o lea ua leva ona galueaiina ma fau ai fale ma teu ai foi nisi o le aiga pe a maliliu, a o lo o tupu pea le mea lea i nuu ma afioaga, a le fiafia ua i ai se tulaga foi lea ua tu ai le tootoo ma tafi lea matai, ae toe sau ai ma le faaiuga foi lea e toe faafoi mai ma le fanua. O le tasi lea vaega lau Afioga i le Minisita, o le taua ia i totonu o le Tulafono lenei, pe o mafai e le Tulafono lenei ona toe faafoi mai le fanua i le pule mamalu a alii ma faipule, a o lea foi ua uma ona aumai i le matai, a o lea foi ua uma ona fai ai le pule a matai.

Pau lea o se vaega lau Afioga i le Fofoga Fetalai, e fia maua ai le vaega lea lau Afioga i le Minisita, ma lou faaaloalo lava.

**FOFOGA FETALAI:** Malo. O le a faasolo uma a outou saunoaga, ona avatu mulimuli ai lea o le avanoa e tali ai le Afioga i le Minisita.

Le sui usufono mo Faleata Sasae, ona sosoo ai lea ma le sui usufono mo Gagaemauga Nu.2, ma le sui usufono mo Faleata Sisifo ae faai mai e se tasi o sui usufono mo Salega, Afioga Afualo Wood Uti Salele. Tulai mai le sui usufono mamalu mo Faleata Sasae.

**Tofa AVEAU TUALA LEPALE NIKO PALAMO (Faleata Sasae):**  
Faafetai lau Afioga i le Fofoga Fetalai, faafetai foi i le Afioga i le Minisita mo le Tulafono Tau Faaofi. Ou te iloa e tele lava vaega o le Tulafono e aoga, e lagolagoina foi le isi vaega o le Tulafono Tau Faaofi. Ae se i ou toe oo lava i le vaega lea na taua e le sui usufono lea na uma atu nei lava, i mea ia i le faatinoina o fale ia i luga e pei ona i ai i le vaega 9 o le Tulafono Tau Faaofi, o lo o faapea mai ai; o se fale e faatu i luga o le fanua o le nuu, village land, a, o lalo la o le village land lea ou te vaai i ai, o le fanua o le nuu i le faasamoa. Ou te fia malamalama ai la aua o lea ou te le o vaai i se definition i i po o le a le fanua o le nuu, po o le fanua o le aiga lea e pule ai le matai, po o fanua na o le nuu, a o lalo foi o le Tulafono, o lo o faapea mai lau Afioga i le Fofoga Fetalai, a fai se faleoloa, ia community purpose, se hall po o le a se mea, e tatau ona aumai le lagolago po o le faatagaga mai i le afioaga. O le vaega la lea pei e tatau ona toe tagai i ai, ona o lea ua i ai faiga a le PUMA i le taimi nei e fai ai le vaega lea, o lea ua i ai le vaega a le PUMA e saisaitia ai i le faatinoina sao lava o le vaega lea, o lea foi ua toe sau i i le Tulafono lea, afai la e feteenai vaega ia e lua, maua mai le pemitia o le PUMA toe aumai uma le vaega e fai ai ae tete le afioaga, pe afai foi e mananao le afioaga e fai ae tete le PUMA ona o uiga lava ia, o le mea la lena e fesili atu ai i le vaega lea e tatau ona toe vaai ai i le vaega lea.

O le vaega lona lua, ou te le o iloa foi i lalo o le village land lea po o fanua nei, pe aafia ai ia freehold lands ia i totonu o le vaega lea, ona i lalo foi o le Tulafono lea e i i le vaega lea e faapea mai ai, e le oo le aia a le nuu i fanua tuu saoloto. Lau Afioga i le Fofoga Fetalai, o lea e manino lava le...vaeatu le afio mai o le Manu Samoa, o lea o lo o manino lava le Tulafono, o lo o faapea mai, e le oo se faasalaga a le nuu i se tagata e nofo i totonu o fanua tuu saoloto, freehold land. O lea foi e fai mai le Tulafono i i, afai ae aamia e le nuu le tagata lea e solitulafono ae le sau i le nuu, ona ave lea e fai le mea lea e tau o le consultation process lea e sau i i, conciliation po o le faaleleiga faasamoa. Ia vaai la i le tele o le nei auala o le a uia ona o le le usitaia o tagata nei, ona o lea ua fai le Tulafono, fai mai le Tulafono, e le tatau ona oo le pule a alii ma faipule i tagata ia, e i ai lava lou manatu, e tatau, e tatau, e tatau ona oo i ai ia le pule a alii ma faipule i tagata nei. Afai e solitulafono, e tatau ona oo i ai le pule a alii ma faipule, ae aua le taumafai aua, ia o le vaega lea o le a oo i ai, pei foi ona...

O lea o le a tuu saoloto lava ia le vaega lenei, tulou lava le mamalu o le atunuu, aua pei ona silafia, o vaega ia o tagata o la e nonofo i totonu o....e moni o la e faatau fanua ae i ai nuu, o la e i ai pulega a alii ma faipule i totonu.

O le vaega lona lua lau Afioga, o lea o le a faatino le vaega lea, aua ou te iloa o le a fai le vaega lenei, e a pe a toe tagai ane i se puipuia o le Tulafono lenei, e mafai ai ona tuu ai i totonu ia tamaiti aoga foi ia e le o toe aoga, o tamaiti ia e fiu ia le Ofisa o Aoga e tulituli e o i le aoga, e fiu le Ofisa o Leoleo e taumafai, o lea ua maua le avanoa i i, e mafai ai ona faaofi i totonu o

aiaiga ia e 15 vaega ia o le Tulafono lea e fai mai e faatino e le vaega lea, o le a le mea e le tuu ai i i i totonu i i, se isi puipui o le vaega lea e fai ai.

Ma le vaega mulimuli lau Afioga e pei ona taua e le Afioga i le Minisita, o le faatauaina o tina. E leai ma se vaega i totonu o le Tulafono Tau Faaofi lenei. O le vaega lea e aupito sili ona tagai i ai tatou, o le taumafai lea e tafieseina le faasaua i tina, aveese, violence. E a pe a tuu i ai ma se section i totonu o le Tulafono Tau Faaofi lenei, aua o i tonu lava e tatau ona foia ai le faafitauli lenei o le sauaina o tina. E tatau ona tuu i totonu o le Tulafono Tau Faaofi po o fea o i, faaofi a ii totonu o i i, ina ia tagai alii ma faipule, o faiga faavae lea o le a resitala i totonu i i ina ia mafai ai ona taofia le vaega lea, aua o lea e pei e faalatele mai le vaega lea, ae le o specific mai i se mea e faapea mai, foia loa.

O le vaega foi lea pei ona taua e lau Afioga lea na aumai ai le tusi a le NUS lea e saunoa i ai le Palemia, ou te auai i nisi o vaega o le tusi lea. O le mafuaaga, tulou lava le mamalu o afioaga ma nuu o lo o faafofoga mai, e i ai afioaga e le mafai ona matai tamaitai, e i ai foi afioaga e matai tamaitai ae le mafai ona nonofo i totonu o nuu. Ia silasila foi, o matai e filifili e aiga, e le filifilia e nuu, o aiga e latou te filifilia matai. Afai la e filifili e aiga e le o se tamaitai, tasi la lena mea e ave i aiga pe afai e faatauaina matai. Ae i ai lou manatu, afai o lea e i ai le polokalame a le Malo e taumafai e atiae ina ia faamalosia tamaitai i totonu o le Palemene, tasi la lea auala e tatau ona faatino i faiga faavae ia, ina ia taumafai e faamalosia e ave se encourage i aiga aemaise o nuu ina ia mafai ona ofi tina i totonu o le saofaiga lenei a matai. Aua e silafia uma lava e tatou nei e nonofo i totonu o le saofaiga a matai, e ese le faataua o tin ape a nofo i totonu o le nuu.

**Tofa Hon Tolofuaivalelei Falemoe Leiataua:** Lau Afioga i le Fofoga Fetalai...

**FOFOGA FETALAI:** Malie, se i tulai mai le Afioga i le Minisita.

**Tofa Hon TOLOFUAIVALELEI FALEMOME LEIATAUA:** Lau Afioga i le Fofoga Fetalai ma le mamalu o le Palemene, o lea foi ua maitau atu ua toai tatou malo faaaloogia i lenei vaega o le aso, o alo ma fanau a le atunuu o le a tauavea le fua a le Malo o Samoa. O se taimi pau atu so outou matupalapala, ae ou te tulai ma le faaaloalo, faafetai mo le avanoa.

A o le vaega lea o tina, o lea sa ou tautala mama lava i le vaega o le Tulafono, e le o i totonu o le Tulafono Tau Faaofi, ae o lo o ou faaleo i se tulaga mama, o la e faalogologo mai le NUS. A o le vaega lea i mea ia e faapea mai e tamau i le Tulafono, o lea ua ou vaai atu ua e tau aafia foi i le Taitai o le Itu Agai i le mea lea o le fai o taliga ae le faalogo, fai o mata ae le vaai. A o le mea ou te tau atu, o Tulafono Faatonutonu, Tulafono Laiti ma faiga faavae nei, e aofia uma ai lava le puipuiga o mea, e aofia uma ai lava. O le mea lena a fai faaiuga a nuu, o le mea foi lena e ave ai e resitala, ina ia tulai mai ni pefea i le lumanai....

O nisi foi e faaua ma le fale i le tausisia o tulafono a le nuu, e oo loa i le faamasinoga, o le taua lena o le faamaumau o tulafono laiti nei i afioaga, o faiga faavae a le nuu, o mea e puipui ai le soifua lelei ma le soifua saogalemu, filemu ma le fiafia ma le soifua maloloina o tagata soifua uma i totonu o se nuu, o lea o le a aafia uma lava i totonu o aiaiga ia o tulafono laiti, o

iugafono, ma faiga faavae. E pei la o le mea lene ua ou vave ai ona vaelupe le saunoaga, ona o lea foi sa i ai le faatonuga a le Fofoga Fetalai o le a ou tali i le iuga. Ae leaga e maitau atu, afai lava o le a tuu le sa e sese i lona alavaa, e tatau ona vave faasao. Ma le agaga faaaloalo lau Afioga. Faafetai.

## ISI FAASILASILAGA A LE FOFOGA FETALAI

**FOFOGA FETALAI:** Ou te manatu ou te vaelupeina le saunoaga a le Maota o lea ua taunuu mai le tatou faamoemoe o lenei aso. I lou agaga faaaloalo, le paia e ma le mamalu o le tatou Palemene i ona tulaga faalupe, o lea ua taunuu mai le tatou Palemene nei le tatou Au o le Manu Samoa. I lou agaga faaaloalo tele ou te talosaga ai i le paia ma le mamalu o le tatou Palemene, tuufaatasi o tatou aao tatou te faafeiloai le taunuu mai o le Au Filifilia a le tatou atunuu, le Manu Samoa ua tatou faatasi i lenei aso.

E lagona ai ua sausaufialele le manu nai Utufiu, e pei o le upu i le tolotolosa o aiga Sa Tupua ma Aiga Sa Malietoa ma Aiga o Mavaega, le paia foi i le Faletolu, Aiga ma Saeseese. Na faapea ai le gagana a le Tuifiti, “O manu o Samoa e laiti ae lotoa.” Ua liligo ai nei le tai o Alo ae noanoa le tai o Tigilau, ua loloma foi le tai o Tumua, ae faafotupule le tai o le Tuiatua. I le agaga faaaloalo tele e avea ai lou leo e fai ma sui o lenei Palemene, o le Palemene o Samoa i le afio o lana Afioga i le Palemia ma le Kapeneta, aemaise sui usufono mamalu uma o le Palemene o Samoa, o lupe lava nei na faia mai le fuifui aua le faiga filifiliga a Samoa, o le Fono Sili lenei, o le malae o le faautugatagi latou te omai e fai tonu aua le manuia o le tatou atunuu. E le faagaloina le tapuaiga malu a Samoa i ona tulaga faalupe, i le paia o Aiga ma latou Tama, o Tama ma o latou Aiga, le Usoga a Tumua ma Pule, Ituu Alataua, Aiga i le Tai ma le Vaa o Fonoti, Aiga o Tupu, Aiga o Nofo, Aiga o Papa, Aiga na Tafaifa, tainane Aiga nai le Itealemalama.

I le tapuaiga a Lana Afioga Mamalu, O Le Ao o le Malo ma lana Masiofo, le Afioga i le Sui o le Fono a Sui Tofia ma lana Masiofo. Le paia i le Tafatolu o Faigamalo, i le afio o le Afioga i le Faamasino Sili ma le Ofisa o Faamasinoga, aemaise le paia maualuga o lea ua tatou tini tauao i lenei aso, aua le faataunuina o le fesilafaiga i le aso.

E manatu foi o le a le afaina le tapuaiga malu aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele ma le Faleagafulu o le motu. O taotoga iasa ia mai le Taisamasama o le Tuimania seia paia Fili ma Puletuu na tauilo ai Malo o Samoa na potopoto, o Samoa ua lauti na laulelei, ua atoa Samoa i le aso.

O le tatalo sa tuuina atu i le Atua, ina ia foai mai se laolao faapenei, se i o tatou laulua fesilafai, se i fai atu se faamatalaga a le Palemene o Samoa, o le upu lava lene a Samoa le atunuu pele a o fotufotu lo outou sa e faataumuaava aua le faagatama o le avefua a le atunuu, e le o toe na ma se laina ua silafia e le lalolagi atoa.

Le paia e ma le mamalu maualuga o tulaga tofi o le tatou Au, i le afio o lau afioga i le Taitai Malaga, aemaise o sui mamalu uma o outou o alo ma fanau a le atunuu, o lenei aso, e tele aso ae le lau aso, e tele foi taeao ae le lau i taeao. A o le aso i lo outou taunuu mai i le Malaefono o le atunuu, o auga na o faamoemoea a lenei Palemene. O le matou tatalo, ia alofagia e le Atua lenei faamoemoe, ina ia ulimasao taaloga ma faagata i le tulaga faatamalii ta

te masani ai i poula pe a fai ma tulaga o faagatama faava o Malo. E le toe tau selu atu pe tau faafuluina le paia ma le mamalu o lo o ua i ina le atoaga o le tomai, le malosi aemaise o la outou sauniuniga ona o lo outou lagona ma le manatu, ua outou taaau mai ona o lo outou fatu, o Samoa o le atunuu pele. O le upu e auau i ai, e mamanu le tavae i ona fulu, i le tatou pese masani, o Samoa e le iloa taua i le faafanua, a o si au taalo faatamalii ma le faatausala ua iloa ai taua. O le agaga lena o le afio atu o le Palemia ma le Kapeneta, le Afioga i leTaitai ma sui Taitai o le Itu agai ma sui usufono mamalu uma o le tatou Palemene i lenei aso, o matou moomooga na e molipo, e momoli atu ma le faatuatuga sili, e manuia o outou faiva. O nei e fau ai taeao mo le lumanai, e leai ni tatou tamaoiga po o ni minerale tatou te finau ai ma atunuu tetele o le lalolagi, a ua faaaoga e le Atua nei faiga faavaitau lenei o i e ala atu ai lo tatou alaimalo. Ma o upu a le atunuu, “E gau lava le sila i le fai.” O lenei la aso, le paia e ma le mamalu maua o alo ma fanau a letatou atunuu aemaise lau Manu Samoa, o le tatalo lena ma moomooga alofa na a lou Palemene i lenei taeao, ia faamoemoe i le Alii le folauga, ma ia outou manatua le tapuaiga a lou atunuu. E le sili le tai i lo le tapuai, e le sili foi le tao ma le uatogi i lo le tapuaiga mau a Samoa o lo o tapuai mai, i le tatalo leleoa a o tatou matua faaleagaga ina ia manuia lo outou alofaiva. Ia outou manatua, e tu manu ae le tu logologo i le aso lenei, e pala foi maa ae le pala tala. O le manuia, o le fua tou te lulu tout e selesele i ai, aua e ifo le fuiniu i le lapalapa.

O la outou taumafaiga uma e tauleleia Samoa, a o le atoaga e toe foi lava le faamanuiaga i o outou aao. O lo o pupula mai mata, tulou le gagana a i latou o lo o faia le filiga, o e o lo o faia le faiva o le filifilia o ausii a le lalolagi atoa, ma le talitonuga e aoga la outou faagatama e saili ai manuia mo aiga ma outou lava, ae faasilisili ai le manuia o si o tatou atunuu. O outou mama na, le paia e ma le mamalu maua o alo ma fanau a si o tatou atunuu, aemaise le tatou Pulega, ina ia manuia lo outou alofaiva.

O Samoa, o le aomamala, o le ia iviivia, e leai se tagata e mafai ona ia toe autalaina, o Samoa o le atunuu ua uma ona tofi, e talatau Toga ae talatofi Samoa. Le Manu Samoa, aua ne i outou talatau aua e alu alu outou vaivai outou malolo. A ia outou talatofi, o lo outou pale ma lo outou ula i le tofi o le tatou atunuu ia uumau i o outou lima, ina ia outou maua le sini o le manumalo.

O a matou upu faaleagaga, “Ia au le Atua ma la outou taumafaiga, o outou mama na. E le o le fitafita e le o le malosi, a o le Agaga o le Atua ua fetalai mai ai le Atua o Au. O Au o le Alii lou Atua, o Le na ou tofi i lou lima tamatau, ou te fai atu ia te Oe, aua e te fefe, o Au ou te fesoasoani ia te Oe.” O la matou upu faaiu, ia pouliuli outou tino, a ia malamalama outou ala. O le tapuaiga lena a lou Palemene e fai ai ma sui i lenei aso le Malo o Samoa ma ona tagata, ina ia manuia lo outou alofaiva. O outou mama na.

Le paia e ma le mamalu o le Palemene i lenei aso, ia tatou usu faatasi le tatou pese faamalosi i le tatou Au, ona tatou alo ai lea i le taumafagati.

*Na lagiina e sui usufono o le Palemene le Viiga o le Atua i le maea ai o le Saunoaga Faafeiloai a le Fofoga Fetalai.*

**FOFOGA FETALAI:** Ou te valaau atu i le Taitai o le tatou Au, le Tofa ia Safotulafai mo se upu faalaeiau mo lenei aso.



*[“Na saunoa le Taitai Malaga, Tofa Namulauulu Sami Leota e fai ma sui o le Au a le Manu Samoa e talifuaitau ai i le Saunoaga Faafeiloai a le Fofoga Fetalai.”]*

**FOFOGA FETALAI:** Ia, tatou tutulai le tatou Palemene, tatou faaali le tatou agaga faaloalo, aumai ni tatou faamanuia tetele se lua i lenei aso.

*Na faataatiaese Taulumaga a le Fono Aoa mo lana malologa i le itula e 11:36 i le taeao ma toe faaauau i le itula e 12:13 i le aoauli.*

*Na toe faaauau felafolafaiga i luga o le faitauga faalua o le Tulafono Tau Faaofi o Teuteuga o le Tulafono o Fono a Nu'u 2015.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoa Faitulafono.

I le ava tele ma le faaloalo e tatau ai, e faaleoina ai le agaga faafetai i le paia ma le mamalu o le Maota i lenei vaega o le aso. Ou te manatu ua taunuu i nuu lelei fuafuaga sa tatou fuafuaina mai le aso ananafi a o lea ua faatinoina ma le atoatoa ma le matagofie i lenei taeao fou. E i a te au o le Fofoga Fetalai le ava tele ma le faaloalo e momoli atu ai le faafetai tele i le paia o le Maota, e le o ni upu e avane ai lenei aso ma la tatou silafaiga ma alo ma fanau o lo tatou atunuu, ona e talitonu le faamoemoe o faiva e tapuaia o faiva e ae manuia.

Ua vaavaai foi ma logo i tino matagi lelei i lenei aso i le tatou fesilafaiga aemaise o lo outou amanaia ma le tali faaloalo o le tatalo atu o le Afioga i le Palemia ma se faatalauala a le Fofoga Fetalai, o lea ua taunuu ai i manu lenei aso. Vii le Atua, o i e iloa ai lo tatou aga e tasi ma lo tatou fetalitonuai i le tulaga a tatou taunuu loa i galuega e manuia ai ma lelei mo le tauleleia o lo tatou atunuu e leai lava se pati e toe sala po o se peau e toe laga vale.

O lenei aso e momoli atu ai le agaga faafetai, o lea ua tuumuli atu la tatou Au o le Manu Samoa ma o tatou moomooga alofa ina ia manuia lau o lo latou famoemoe.

Ua ou manatu foi i lenei itula o le aso i le paia ma le mamalu o le tatou Maota, ua tatou taunuu ai foi i le taunuuga o le tatou Fonotaga. O lo o i ai nisi o fuafuaga faataatitia a le tatou Malo ma nisi o tulaga taua e pei lava ona tatou tauavamea mai ai i le amataga i le tatou Tala o le Tupe. O lea foi ua tatou taunuu mai i le faatulagaina o a tatou Tulafono Tau Faaofi tuua ma Tulafono Tau Faaofi ua faasee atu ina ia faaauau ai galuega a Komiti, ou te manatu ua matua tele ma anoanoai lenei galuega mo lenei foi Fonotaga o lenei masina.

Ua ou manatu e momoli atu ai le faafetai tele, o nisi foi o sui usufono sa faaalua finagalo, o manatu ma lagona i lenei Tulafono Tau Faaofi taua, e le auaoa le lagi. Ou te manatu foi e le tau silasila faafofoga le atunuu i se upu ma se tala, o se tuleiga ma se saunoaga ua outou te sausaunoa i ai. Ua nofo fale ia satuiamaa ua uma foi ona tatou soalaupule ma faaali so outou manatu e ala i le tatou fesilafaiga ma le faailoa o manatu i le Ofisa Sili o Pulega i futia

ua sola ma aso ua alu ou te manatu i lou talitonuga na o au, ua lava ma totoe lea aua le soalaupuleina o lenei Tulafono Tau Faaofi.

Ua saunoa faamalamalama foi le Minisita ma ua tali fuaitau le Afioga i le Palemia, ou te manatu ua atoa lea vaisua i le faamalamalamaina o lenei Tulafono Tau Faaofi. Ona ou manatu ai lea, o le a tuu atu le Fesili e pasia ai le faitauga faalua o le Tulafono Tau Faaofi ona tatou malolo ai lea. Ae i lou avanoa o lea e tataua ona tatou molimauina faatasi, tatou agai o lea tatou te i le mood o le fiafia, ina ne i mea ane foi ua ou fiu e toe vaovao nisi a o lea ua see le tatou taumafaga ti ma ua pue la tatou ata ma ua tele ma anoanoai lenei aso.

Faafetai atu i lau Afioga i le Minisita ou te manatu ua atoatoa lau Tulafono Tau Faaofi ae o le a avatu pea le avanoa.

**Tofa Hon TOLOFUAIVALELEI FALEMEOE LEIATAUA:** Ou te momoli atu le agaga faafetai i le saunoaga foi o lea ua logo i tino le faafofoga a le Maota e tusa o le faaiuga o lea ua aumai, ae tataua foi ona avatu se faafetai i le saunoaga, aua le tali aloaiaina o alo ma fanau a le atunuu le Manu Samoa. Ua avea ai lau Afioga i le Fofoga Fetalai o le Palemene e fai ma o tatou sui, o le mea lea ia avea pea ma fatu e pau i le eleele lelei ma ia faaosofia moegaluaga aua se tofa i o tatou alo ma fanau vaeatu o latou sa ma paia. E le gata i lea o le Pulega ina ia maua lo latou malosi ma le talitonu ma faamoemoe i le Atua. O la matou tala, ia alofagia e le Atua le alofaiva o nai o tatou fanau, ia o latou sii lo tatou atunuu i tumutumu mauga e pei o lea upu.

Ia manuia lo latou faatautaiga o le Au, ia lototetele ma ia faamaoni ia latou koloni i nai nei aso o totoe. Ia maua pea lo latou malosi a ia mamao ni mala ma ni puapuaga a ia ae ma le malo lo latou faamoemoe i lenei vaiaso fou pe a aulia i le alofa o le Atua.

Ua ou tulai ma le agaga faaaloalo, ou te usitaia lou finagalo aua le vaega lea e faauma atu ai la matou tala. Faafetai i sui usufono o le Tautua ma le mamalu o le Palemene na afea lenei Tulafono Tau Faaofi Toe Teuteu i o latou finagalo, o le toatele lava na fesili mai o le fia malamalama ma fia faalautele nisi o vaega. Ae pei e faalia i nisi o finagalo o le le malamalama i le Tulafono Tau Faaofi ma le iloa foi tulaga o le faamoemoe o le Malo i le Tulafono Tau Faaofi Toe Teuteu lenei. Na ona ou faamanatu atu pea, e pei lava o upu lenei e pei ona tatou faalogo pea i ai, i le Taitai o le Itu Agai ina ia ona silafia lenei itu taua o le “ignorance of the law is no excuse” e te le mafai ona e lafi i tua i lou le silafia ma malamama i le Tulafono a o lenei e i ai se tasi o sui usufono mo Vaimauga Sisifo, Lefau Harry Schuster ma le sui usufono mo Faasaleleaga Nu. 2 e fesoasoani ia te oe e maua ai le malamalama ma manuia ai le Tautua. Ia o lau tala lea, “ignorance of the law is no excuse” le Taitai o le Itu Agai.

Ma le faaaloalo.

**Afioga Hon Palusalua Faapo II:** Lau Afioga i le Fofoga Fetalai, o le mea lea e vevesi ai le Maota o lou le saunoa sao i lau Tulafono Tau Faaofi, ioe. A o le tulaga faapea e le malamalama lenei Itu, e ala ona avatu manatu o le matua malamalama lava a o le faalavelave e te le malamalama i lau Tulafono Tau Faaofi.

O le mea lea lau Afioga i le Fofoga Fetalai, ua ou faamagalo ia te oe leaga o lea ua e manao e vave uma le fonu.

**FOFOGA FETALAI:** Ou te manatu...malie le sui usufono mo Gagaemauga Nu. 2...

**Tofa Levaopolo Talatonu:** Lau Afioga i le Fofoga Fetalai, ou te usitai lava i lau Afioga ma lau faaiuga a o au o le a ou popole o lea o le a pasia ao le tele ia o le faaletonu o le Tulafono Tau Faaofi lea na ou fia tautala i ai, ae tatou alu ia faapea.

**FOFOGA FETALAI:** O lo o avanoa Mea Taitasi e maua ai o outou avanoa.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Fono a Nu'u 2015 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi o Teuteuga o le Tulafono o Fono a Nu'u 2015 i le Komiti o Faafoga tau Pulega a le Malo mo le iloiloina ma toe lipoti mai i le Fono Aoao i se Fonotaga o lumanai.

**Tofa Lealailepule Rimoni Aiafi:** Lau Afioga i le Fofoga Fetalai ona o lea ua fai lau faaiuga o le a le afaina ae sa tataua ona vave logo mai matou. Ae vaai lau Afioga, e tai sefulu pages o lauga nei ua uma ona tusi e fesoasoani ai i le Tulafono Tau Faaofi.

**FOFOGA FETALAI:** Ua maua lou finagalo le sui usufono mo Faleata Sisifo, leaga o lea faatoa e afio mai nei ua ou ave le maliega i sui mamalu uma o le a tatou faagasolo.

**Tofa Lealailepule Rimoni Aiafi:** Ou te alofa i le Minisita e le o atoatoa, o lea e lafo mai i, ae le afaina faafetai o le a toe taatia nai o matou manatu. Aua po o le mea lea e saunoa soo ai le Palemia i le sese mai ia Atamu ma Eva na lelei lava Atamu ma Eva, ae na omai loa ma nei Loia oki akoga loa ma le mea.

**FOFOGA FETALAI:** E momoli atu le faafetai tele i le paia ma le mamalu o le Maota, ou te manatu ua tatou tini tauao i le faaiuga o a tatou galuega i lenei aso, ua ou talitonu ua lava ma totoa la tatou galuega. O le a tatou malolo e fai sina advance i le itula e 1:00 e lava ai la outou malologa i lenei aso.

Ona ou talitonu lea, le paia ma le mamalu o le Maota Fono, e pei ona fai atu sau upu i le taimi ua sola, faafetai mo la tatou usugafono o lenei masina, out e manatu ua tele ma anoano le tatou galuega ua uma ona asa ma faatino.

O le tatalo, ia alofagia e le Atua lo outou soifua i lana puipuiga i peau o le ea, peau o le vasa ma le feagai ai i tiute ma galuega e le gata o le tagata lava ia, o aiga, Itumalo, nuu ma afioaga o lo o tapuai mai, ia alofagia e le Atua ina ia maua pea lo outou soifua maua ma le soifua manuia ma ia tatou toe lau fesilafai ai iinei i le tatou Maota Fono i le aso o le a tatou tolopo ai.

Samoa e o le atunuu pele, e talitonu le agaga o lenei aso ua ae manuia faiva o lau Palemene talu le tapuaiga mau. Faafetai i tupu ma ee, o faleupolu ma failauga, faletua ma tausii, saoa ma tamaitai, malo le onosai i lenei aso. Ia faaauau pea la outou fatuaiga tausii aua le tautuaina o le atunuu, o manu na o folauga o lenei vaiaso ma lenei masina. O le Aufaigaluega Paia a le Atua, e

leai se masalosalo i la outou tatalo e le aunoa e le faaitiitia ai le suauu manogi i le fagu ma le falaoa i le kate aua le upu folafola aua lo otuou faafale-le-malu i le tapuaia o agaga e faasaoina mo le atunuu. O outou mama na, tatou tatalo pea i le Atua o se taimi ma se aso foi tatou fesilafai i luma o talosaga ia mana pea le upu i la outou galuega.

Ona foi mai lea o sa matou faamatalaga i Ofisa Sili o Pulega o Matagaluega o le Malo o lo o tautuaina le Malo, malo le onosai. O le tapuaiga mau i le tafatolu o le Faigamalo i lau Afioga i le Faamasino Sili ma le Ofisa o Faamasinoga i lenei aso, malo le galulue, malo tauatai. A o le i faaiuina a tatou Galuega i lenei aso, ou te tatalo atu i lau Afioga i le Aoa Fesoasoani po o lau Afioga i le Sui Taitai o le Itu Agai o le ao sinasina o lena itu o le Maota, tulai maia e fai sa tatou tatalo e faaiu ai lenei ona tatou tolopo ai lea.

*Na tolopo Taulumaga a le Fono Aoa o le itula e 1:00 i le aoauli seia aulia le itula e 9.00 i le taeao o le Aso Lua, 18 Aokuso 2015.*